

obeikandi.com

3 بنات

الكتاب : 3 بنات
المؤلف : سهيلة خميس
تصميم الغلاف : مي يسري
تدقيق لغوي : أحمد أسامه
رقم الإيداع : 2015/10025
الترقيم الدولي : 978-977-778-027-8
الطبعة الأولى : 2015

20 عمارات منتصر – الهرم - الجيزة
ت-011-27772007 02-35860372
Noon_publishing@yahoo.com
جميع حقوق الطبع والتوزيع محفوظة للناشر



3

بنات

رواية لـ

سهيلة خميس

للنشر
والتوزيع

obeikandi.com

الإهداء

إلى شمس حياتى التى بدونها لا يوجد نور على سطح كونى ..
أمى !

ثم أبى المكافح ... وأخى المشاكس.

وإليك أنتَ أيها الصديق السماوى .. يا من تظننى ملاك
وتنادينى بالغالية

obeikandi.com

في مجتمعنا العربي..

حرية المرأة خطأ .. وخطأ الرجل حرية!

obeikandi.com

في عيدها الأربعون.. قررت الرجوع إلى أرض الوطن قبل عيد مولدها
بأيام لتحفل بطريقة مختلفة!

قررت ترك حاضرها ومستقبلها والرجوع إلى ماضيها لبرهة من الزمن..

تحتفل وسط الذكريات تحتفل بإنجازاتها التي حققتها طوال العمر، و
تتحسر على ما فقدته أمام طموحاتها، قررت الرجوع إلى مصر ..
الأسكندرية مسقط رأسها و طفولتها و فترة مراهقتها حتى سن
رشدتها. وصلت إلى مطار القاهرة و من القاهرة إلى محطة مصر
بالاسكندرية ثم إلى البيت القديم الذي كانت تملك مفاتيحه، و لم
تخبر عائلتها بقدمها قررت الاحتفال بمفردها أولاً ثم الذهاب إلى
العائلة والأصدقاء ..

قالت لأمها أنها سوف تاتي يوم مولدها.. كذبت لأنها بحاجة إلى
الجلوس مع نفسها حتى تلملم ما تبقى منها إلى اخر طريقها في الحياة
ولا تدرى هل سوف تستطيع أن تبدأ حياتها من جديد والزواج من
حافظ بعد الأربعين أم لا !

هل من الممكن أن تعطيا الحياة فرصة أخرى لتصالح بعض الأخطاء
التي اخطأنا في الحياة ؟

هل من الممكن أن تُكوّن أسرة بعد الأربعين ؟

هل من الممكن ؟

في محطة القطار كانت قد وصلت فريدة إلى الاسكندرية، كانت تستطيع أن تشم رائحتها حتى وهي بعيدة عن البحر كأن هذه المدينة لها رائحة مختلفة عن أى مكان بالعالم كله. استرجعت نفسها وروحها عندما اشتمت هوائها من جديد، كانت دائماً خائفة من أن لا تستطيع أن تشم هذه الرائحة مرة أخرى واستقلت سيارة بالأجرة حتى تنقلها إلى مكتب تأجير سيارات ملاكى لتستطيع أن تحوم في المدينة ليلاً دون تطفل أحد وتستعيد جميع الذكريات، وبعد أن وصلت واستأجرت سيارة لمدة أسبوع لتذهب بها غداً إلى القاهرة حتى تمضى عيد ميلادها مع العائلة والأصدقاء ثم تاخذهم جميعاً وترجع في اليوم الذى يليه إلى الاسكندرية ليقضوا باقى الوقت هناك حيث الذكريات.

ثم ذهبت إلى البيت لتجد رائحة التراب تملأ الأجواء حتى فوق قطع القماش التى تغطى أثاث المنزل باكملة، لتطلب من زوجة حارس العمارة أن تساعد في تنظيف البيت، ثم بدأت بتنظيف غرفتها القديمة أولاً حتى انتهت من المنزل وتركها وحدها أم رامى بعد قضاء وقت طويل في رحلة النظافة وبدأت فريدة رحلة الذكريات في غرفتها

القديمة.. لتذهب لأول يوم بكت بسبب الدورة الشهرية كانت في الثالثة عشر من عمرها و أقسمت لوالدتها أنه لم يجرؤ أحد على لمسها و أنها فوجئت بنفسها غارقة في دمها ! وسخرت منها والدتها وشرحت لها الأمر

ولأول مرة أحست أنها أنثى صغيرة و وقعت في الحب مع زميلها في المدرسة ولأول مرة تعترف لوالدتها أنها وقعت في الحب .. تتذكر ان والدتها سألتها عن أخبار الولد الذي كان يرافقها في رحلة المدرسة و قررت ان تعترف لها بكل شيء .. لأول مرة تعرف معنى جملة "غيرة البنات" لأول حب ولأول قبلة وأول حضن وأول كل شيء لأن أول كل شيء يكون أجمل بكثير ولا يدوم طويلاً

كانت الحياة بالنسبة إليها تتجسد في أمها، كانت ترى أن أمها أعظم أم في الوجود. لأنها ضحّت بكل ما تملك في الحياة من أجلها، من أجل أن تصل إلى ما وصلت إليه الآن. لكن لا تعرف يجب ان تلوم أمها على ما وصلت إليه أم تشكرها، كانت في حالة شعورية متضاربة (سعيدة و حزينة) في الوقت ذاته. امها كانت تحلم لها بمستقبل باهر كانت تحلم بأن تصل إلى أعلى مراتب النجومية و أن تكون سيدة من سيدات المجتمع، لم تكن أمها مثل جميع الأمهات حلمها أن ترى ابنتها الوحيدة في عش الزوجية سعيدة مع زوجها و ترى

أحفادها أمامها.. كانت ترى أن الزواج مشروع اجتماعي فاشل و
اقتنعت الابنة بهذا المبدأ بعد مشاهدة تجارب زواج عدة أمامها و
كان كل تفكيرها في أن تحقق ذاتها أولاً ثم إن صادفت الحب لا تتركه
أبدًا و كانت لا تريد الزواج بدون حب وكانت لا تبحث عنه لكن هو
من كان يبحث عنها !

هو من يفتح لها طريق آخر دائمًا يهرها من بعيد، لكن كانت فريدة
تخاف الحب بشدة لأنها تدرك أنه ضعف وهوان وأنها إذا أحببت
ستكون عبدة للحب والمشاعر وعندما وقعت في الحب انكسرت
وكانت هذة أول قاعدة تتعلمها، أن تحب ولكن لا تقع في الحب لأن
كل شيء في الدنيا إذا وقع ينكسر !

ورغم انكسارها استطاعت ان تلمم ما تبقى من فتات قلبها وتلصمه
حتى تستطيع أن تعيش به إلى اخر العمر لكن عاهدت قلبها أن لا
تألمه أبدًا مرة أخرى وأنها سوف تحافظ عليه من أى مكروه ومن أى
سوء قد يمسه

امتلكت فريدة السلطة و المال و عندما تملك المرأة السلطة و المال
تصبح جبروت .. جبل ما يهزه ريح .. عائدة في الأربعين من عمرها ..
عائدة سيدة مجتمع ينحن إليها أعظم الرجال .. عائدة وحيدة ..
بالحب لكن .. بلا زواج .. بلا أولاد

تبحث عن ماضيها .. عن أصدقائها .. عن حياتها السابقة

وتسبح في خيالها و تعود بالزمن إلى الخلف .. لتعيش في خيالها مع ماضيها ..

كانت تبلغ من العمر 18 عشر عامًا .. عندما كانت في العام الدراسي الأول لها في كليه الإعلام .. كانت فتاه متحررة الفكر لا تخشى شيئًا ولا تخشى العادات والتقاليد لأنها لا تقع في أى خطأ يُحتم عليها الخوف منه .. وهذا هو سبب خلافها الدائم مع صديقة العمر .. "نور" وسبب صداقتها مع "نهى" .. وفشل أى علاقة حب بينها وبين أى شاب لأنها حرة ولا يمكن لأحد أن يأسرها حتى لو كان باسم الحب .. حتى وقعت في الفخ !

وقعت في الحب و تغيرت مبادئها و بدأت رحلة المعاناة و التعب و الانعزال عن العالم الحقيقى و سبب إصرارها على أن تكون فريدة محمد سلطان التى تحمل رسالة و يجب أن تؤديها على أكمل وجه..

تذكرت أول مرة رأت فيها حبيب العمر "عمرو" كان يوم 28 نوفمبر في ليلة قارسة من البرد كان عيد ميلاد صديق مقرب لها و كان عمرو صديق أحمد وكان أول لقاء وأول خفقة قلب و أول نظرة عين تُبْرِجَل كل الأمور..

كانت فريدة مع سليم مرّ عليها ليصطحبها لأنها لا تعلم المكان كانت أول مرة تذهب إليه وتأخروا بسبب المطر ووصلوا مع بداية الاحتفال و انطفأت الأنوار والكل يغنى ويتمنى لأحمد عام سعيد بعيد عن الألم و ملئ بالطموحات وعندما عادت الأنوار وجدت فريدة نفسها أمام فارس أحلامها .. نظر إليها نظرة لم تنسها أبدًا .. نظرة حب .. نظرة تقول مئات الكلمات الجميلة .. نظرة تسحر أى امرأة على سطح الارض

وقال لها : أنا عمرو صديق أحمد وانتي ؟ أنت فريدة صديقته المقربة و سبب معرفته بنور ؟

كل الحروف و الكلمات تبعثرت من رأسها و هزت رأسها وقالت: نعم أنا فريدة !

قال: إنتى اسم على مسمى فريدة .. وفريدة من نوعك.. ملاك

جاء أحمد ممسكًا بيد نور ويقول لهم: انتوا تعرفوا بعض ؟

قالت : لا صاحبك بيعرفنى بنفسه واضح انك بتحكى عنى كثير

ضحك و قال : أكيد انتى وش الخير والبركة لولاكى ما كنتش هعرف نور عينى

ضحكت نور وقالت : فريدة .. ده بقى عمرو صاحب أحمد اللي يوماتي
واخده منى واسأله انت فين يا أحمد يقولى انا مع عمرو .. بتعمل ايه
يا أحمد .. ياستى أنا مع عمرو ما تشوفيلنا عروسة لعمرو عشان
نخلص منه وأحمد يفضالى

فى دخلة سليم بيسلم على عمرو وأحمد ونور وبيقول لفريدة أنا لازم
امشى تحبى أوصلك ولا قاعدة شوية ؟

قالت فريدة لأقاعده شوية امشى انت

سليم : طيب هكلمك لما اروح أتظمن عليكى

فريدة: ما تقلقش أنا أحمد ونور هيوصلونى

وخرج سليم من المكان واستكملت نور حديثها وقالت: ها يا فريدة
هسب الموضوع دة عليكى عايزين نخلص من عمرو

وضحك الجميع وأكملوا باقى الحديث عن الأدب والشعر والمزيكا

وبعد أن مضت ساعات قالت فريدة لأحمد: أحمد انت هتوصلنى أنت
ونور أنا جايه من غير عربيتى و قولت لسليم يمشى

أحمد: بصى هو صعب حبتين عشان أنا لسه هكمل السهرة عند نور
فى البيت مع باباها ومامتها بس هخلى حد يوصلك

هى: حد زى مين ياخويا بقولك ايه انت اللى كنت عايزنى اجى يبقى انت
اللى تروحنى

أحمد: طب بلاش حد ينفع عمرو؟ أنا شايف استلطف يا عم الله
يسهلوا .. طول القاعدة هو يوجهلك الأسئلة وانتي تردى عليه بس
بقولك ايه هو صاحبى أهو بس خلى بالك منه عشان عينه زايدة
وبتاع بنات.

هى: ما انت كنت بتاع ايه قبل ما تعرف نور بتاع بطاطا خليك فى
حالك ويلا قوله يوصلنى عشان ماما قالبه الدنيا على التأخير
اتفضل

هو: هى مجتش معاكى ليه والله وحشتنى

هى: المرة اللى جاية إن شاء الله

هو: عمرو بقولك ايه انت هترّوح فريدة على سكتك عشان وهى جاية
كانت مع سليم والوقت اتأخر

عمرو: بس كدة عينيا أنا تحت أمر الملاك

فريدة: شكرًا يلا بينا (:)

ركبت فريدة مع عمرو وكانت من أسعد أوقاتها لأنها ستنفرد بفارس
أحلامها الذي أبهرها بنظرة عان

وفي الطراق طلبت منه أن يتوقف عندما بدأ المطر وتركت كل شيء
وأمام البحر مباشرة نزلت ترقص تحت المطر

عمرو: انتى بتعملى ايه يا مجنونة ؟

فريدة: لو مش عاجبك امشى وسيبنى

هو: اسيبك ابيه لأ انتى شكلك مجنونة رسمى

هى: هشششش

فأغلق عمرو السيارة وظل يراقب نظرات فريدة كأنها طفلة صغيرة
ترقص على أنغام الرعد مع المطر واقترب منها فقالت: نزلت ليه جاي
ترقص معايا ولا تشدنى عشان نمشى

هو: بصراحة كنت نازل أرجعك بس لما شفت عنيكى مع لمعة الضوء
على أتم استعداد إنى أعمل أى حاجة انتى عايزاها .. أصل عيونك
بحروما كان الغريق إلا أنا

فابتسمت ورقصت معه تحت المطر

وكأنت أول رقصة تحت المطر تجمع بين الاثنين في أول لقاء لهما .. ثم
اوصلها حتى باب المنزل وتبادلوا الأرقام ثم قال لها تصبحين على خير
يا ملاك ومضى

فركضت فريدة مسرعة على السلالم حتى وصلت إلى باب المنزل ثم
دخلت وبدلت ملابسها واستلقت على السرير تفكر في أحداث اليوم
وسرحت في عيون عمُور حتى رن هاتفها توقعت أنه هو المتصل لكنه
سليم..

- ألو..

- لسه صاحية ؟

- ايوه

- رُوحتى امتى ؟

- من ساعة كدة

- مين وصلك ؟

- عمرو صاحبكم ده

- وانتي ازاي تسمحي لعمرو انه يوصلك وانتي ما تعرفيهوش

- كفاية انه صاحب أحمد

- ودة كفاية انك تركبي معاه لوحدك ويوصلك عادى يعنى؟

- وأنا اتعرفت عليك ازاي ماهو موقف شبه كده برضو

- أنا حاجة وهو حاجة

- اشمعنى يعنى؟

- هو كده!

- وبعدن انت مالك بتحاسبني ليه أظن اني كبيرة كفاية إني اعرف ايه
الصح وايه الغلط

- لأ مش كبيرة كفاية وبعدن أنا بخاف عليكى

- من امتى يا سليم؟

- من النهاردة عندك مانع؟

- اه عندى مليون مانع وتخاف عليا بتاع ايه انت!

- بخاف عليكى عشان بحبك يا فريدة ارتحتى كل ده وعاملة نفسك
هبله واقول اكيد هتحس اكيد هتحس لكن لو مش حاسة ادينى
بقولها لك أنا بحبك برغم كل حاجة وحشة فيكى أى ولد بيشوفها

وبيبعد عنك عشانها بحبك برغم انك بتشرى سجاير وبتسهرى و
بتلبسى قصير بحبك زى ما انتى كدة وأنا عارف انى لو دخلت حياتك
هتتغيرى عشانى عشان أكيد أنا استاهل انى أكون فى حياتك عشان
أنا بحبك عشان خايف عليكى عشان عايز أحافظ عليكى من عين
أى حد!

- فريدة تسمعه فى صمت رهيب ثم قالت : بس أنا مش بتغير عشان حد
يا سليم ولا عايزه أنغير عشان حد عشان أنا كده ولو انت بتحبى
كده يبقى تاخذنى زى ما أنا بعيوبى قبل مميزاتى ولو مش عاجبك
يبقى ابعده عنى عشان أنا ما أنفعلكش

- بس اللى بيحب حد بيتغير عشانه يبقى انتى مش بتحبينى يا فريدة

- الموضوع مش إنى بحبك أو لأ مفيش حد بيتغير عشان حد و حتى لو
اتغيرت مش هلاقى نفسى وهرجع ادور عليها وهرجع زى الأول .. الطبع
بيغلب التطبع يا سليم

- لا اللى بيحب حد بيتغير عشانه

- لا انت فاهم غلط فى فرق لما تلاقى انت نفسك بتغير لوحدك عشان
الحب وانك تتغير عشان حد عايزك تتغير وأنا لأخر مرة هقولها لك أنا
مش بتغير عشان حد , عايزنى زى ما أنا مفيش مشاكل لكن لو مُصِرَّ

انى اتغير عشان عاداتك وتقاليديك يبقى مش أنا روح شوف أى
واحدة غيرى!

- بس أنا عايزك انتى..

- لا يا سليم أنا عجبك من برا بس انت لو كنت شففتى من جوا
كوس مكنتش طلبت انى اتغير انت عايز فريدة البنت الجريئة اللي
مش بيهمها حد لكن فى نفس الوقت ماشية عكس المجتمع شاذة
عنه فانت هتحاول تغيرها ظاهرياً لكن جوهرياً انت عايزها زى ما هى
بس بعيد عن مجتمعنا وانت كده بتناقض نفسك يا أختى وأنا هفضل
عند مبدأى فليذهب المجتمع والناس إلى الجحيم!

- خلاص يا فريدة أنا أسف

- من غير أى اعتذارات و كأننا ما اتكلمناش المكالمة دى أصلاً و احنا
أصحاب و معاملتى مش هتتغير معاك بس لو فتحت الموضوع ده
تانى انسى انك تعرف واحدة اسمها فريدة أصلاً ويللا عشان عايزه
أنا تصبح على خير.. سلام!

- سلام

سليم أغلق الخط وظل حائرًا .. هل هو اخطأ عندما اعترف بحبه
لفريدة أو أنها على حق وأنه معجب بها ظاهرياً فقط وظل فى حيرة
من أمره..

أما فريدة فأشعلت سيجارة وظلت تفكر في كلام سليم .. لماذا كل شاب يراها ظاهرياً فقط لماذا لا أحد ينظر إليها من الداخل أم أن الألوان لم يأت بعد ! فدخلت لتحكي لوالدتها على اليوم بأكمله حتى مكالمة سليم لها لأنها تعودت ان تشاركها كل تفاصيل حياتها وانتظرت فريدة أن عمرو يحادثها يطمئن عليها لكن لم يحدث ذلك فنامت بعد أن أنهت حوارها مع أمها حتى تستطيع النهوض صباحاً للجامعة

سليم كان طول الليل يفكر هل هو حقاً جدير بفريدة أم أن فريدة لا تليق به وكان لا يعلم كيف يعتذر لفريدة عن ما صدر منه لكنه قرر أن يبعد ويختفى عن حياة فريدة حتى تستقر عواطفه ويتقدم بشكل رسمي ليخطب فريدة وكان متأكدًا أن فريدة لن يكون أحدًا في حياتها لأنها لا تعرف معنى الحب لذلك هو كان مطمئنًا أن في خلال هذه السنة التي سوف يركز فيها في عمله حتى يستطيع أن يخطب فريدة لن يكون في حياتها أحدٌ بالمرّة. كان يرى أنه لا يوجد أحد يقدر على القرب من فريدة بسبب جرأتها ولكنه لا يعلم أنه يوجد في الحياة من يفكرون عكس تفكيره تمامًا من يفكر بشكل سلبى يظن أن الناس أجمعين يفكرون بهذا الشكل لذلك أرسل لفريدة في الصباح الباكر رسالة يكتب فيها " أنا أسف .. أنا هتختفى من حياتك وهظهر في الوقت المناسب بس بلاش تزعلنى منى " ولم تهتم فريدة بهذه الرسالة على الإطلاق كان لديها ما يشغل تفكيرها بزيادة أما على

الجانب الآخر في الصباح الباكر استيقظت فريدة وذهبت إلى الجامعة وكان أول أسبوع لها في كلية الإعلام تعرفت على كثير من زملائها مثل رانيا ونهى وهالة وغيرهم الكثير لكن حتى الآن مجرد زمالة جامعة ليس إلا .. كانت تعتز جدًا بصداقتها مع نور لأنها رفيقة الطفولة حتى برغم خلافهم الدائم على أسلوب حياة الآخر منهم لكن هى صديقة عمرها , ما كانت تتوقع أن يكون لها رفيقة درب أخرى تشارك نور فيها ولكن الصدف تخبىء الكثير من المواقف و المغامرات.

أنهت يومها الدراسى وكانت على ميعاد مع نور وأحمد فى إحدى المقاهى المجاورة للجامعة وعندما ذهبت وجدت نهى زميلتها تدخن وعندما رأت نهى فريدة تركت الشيشة من يدها فذهبت فريدة لتسلم عليها من جديد وتجلس معها وتشعل سيجارتها

وقالت لها : نهى كملى شيشتك انتى خايقة ليه اعرف انك بتدخنى؟

-لأ ابدًا أصلى مش بحب حد يعرف عشان السياح وكده

-طب وايه يعيبك فى انك بتدخنى دى حرية شخصية مش من حق حد أصلاً انه يحاسبك

-بس انتى عارفة يا فريدة لو حد عرف من الكلية هيمسك عليا ذلّة وكده وأنا مش بحب المشاكل

-مشاكل ايه يا هبله انتى وأى حد ماله أصلاً انتى حرة تشيشى
براحتك اللى ليه عندك حاجة ييجى ياخذها

-بصى يا بنتى أنا لو حد عرف ممكن يكون يعرف اخويا ويوصله
الموضوع ده أنا اتديح فيها

-طيب ولما انتى شايقة ان الموضوع غلط وخايقة قوى كدة بتعملى ده
ليه ؟ يا تكونى قد الحاجة وتعملها قدام الكل يا بلاش أنا مثلاً كان
صعب عندى انى اعرف أهلى انى بدخن بس عشان ما كانش فى
موقفك ده فى يوم من الأيام اتقبلوا الوضع غصب عنهم عشان فى
الأول والآخر أنا بضر نفسى مش بضر حد تانى وأنا حابه الموضوع
وخلص

-فريدة انتى حاجة وأنا حاجة انتى أهلك قبلوا عشان أصلاً مسموح فى
عاداتكم ان البنات ممكن تدخن لكن أنا بابا مش بيشرب سيجارة
حتى انتى متخيلة الموضوع صعب ازاي

-امال انتى المفروض فى دلوقتى يعنى بتقولى ايه لأهلك فى الوقت
اللى انتى برا فيه بتشيشى ؟

-بقولهم كورس أو عندى محاضرات متأخرة

-يعنى بتكذبى

-بس كذب أبيض

-هو حتى الكذب عملتوا منه الوان ! اقصر طريق يا بنتى الصراحة
واللى مش عاجبه يخبط دماغه فى الحيط

-ده عندك انتى

فى دخول نور وأحمد قامت فريدة لتُعرِّف نهى على نور وأحمد
ويجلسوا سوياً

فريدة قالت: نور صاحبة عمري وأحمد فى مقام خطيها وصديقى
الصدوق

نهى: اهلاً

فريدة: نهى زميلتى فى الكلية وهتكون صاحبتنا ايه رأيكم يا شباب ؟

نور وأحمد فى نفس ذات الوقت :ازيك يا نهى ؟

نهى: تمام (وابتسامة صفرا)

فريدة تسأل أحمد : فين يا عم صاحبك الحليوة بتاع امبارح ؟

أحمد: عمرو ؟

فريدة: هو في غيره ؟

أحمد: السنارة غمزت ولا ايه ؟

فريدة: لطيف

أحمد: زمانه جاى لما عرف انى نازل اقبالك أنا ونور قال هيبجى

فريدة: طيب أدبنى قاعدة هروح فين

نور: أنا داخلة الحمام حد فيكم هيقوم معايا يا بنات ؟

نهى وفريدة في نفس ذات الوقت : أنا هاجى معاكى !

نور: طيب يللا انتوا الاتنين

وذهبوا البنات إلى الحمام وظل أحمد في حيرة لماذا الفتيات لا يحبين الذهاب إلى الحمام بمفردهم ؟ هل يحبون التحدث في شىء ما خاص بينهم ؟ نور ونهى أول مرة يتلاقون سيظل اللغز هذا غامض حتى احله وقريباً اكيد.

في الحمام نور تخرج من حقيبتهما سيجارة وتشعلها فتسألها نهى : أحمد ما يعرفش انك بتدخنى ؟

نور: لأ طبعاً ده الإنسان اللى أنا مقررة انى أتجوزه ازاي يشوفنى كويسة
لو عرف انى بدخن

نهى: صح كدة عشان ميفتكروش انك مش كويسة

نور: لو ما كنتش مقررة انى اتجوزه كان عادى قشطة مش فارق لكن
لو عرف كان عمره ما هيفكر فيا فى انى أكون شريكة حياته وكده

نهى بصوت ضعيف : ومش بتخافى فريدة تفتن ؟

نور: لأ طبعاً مستحيل اه أحمد صاحب فريدة من قبل ما أنا لعرفها و
هى سبب اننا نرتبط بس فريدة جدعة عمرها ما هتقوله على أى
حاجة بعملها حتى لو هى مش راضية اه تنصحنى بس كل واحد حر
أنا مش بسمع كلامها لو كانت هى صح ما كانش ده بقى حالها كل كام
شهر فى حد فى حياتها بيبقى شايفها غلط ولما بيقترب وبيلاقها كويسة
يبعد عنها عشان هو من الأول داخل على أساس انه يعط معاها ..
اسلوبها فى الحياة مش عاجبنى بس هى حرة

فريدة تخرج من المرحاض وتقول لنور : سمعت كل حاجة وقولى
براحتك كل حاجة بكرة الأيام تثبتلك انى صح وانتى اللى غلط أنا
اللى فى النور وانتى اللى فى الضلعة .. تقدرى تقوليلى انتى لما تتجوزى
أحمد هتخبي موضوع السجاير ده ازاي ؟

نور: هبطلها

فريدة : كدابة دة لما كان عندك برد وكحة ما كنتيش قادرة تشربى
سيجارة عشان بتتعبك كنى هتموتى اكر

نور: دة عشان أنا بشرب بجد لكن أنا قبل الجواز بشوية هبطلها
خالص عشان أنا هخلف واجيب أولاد ولازم صحتهم تبقى كويسة

فريدة: انتى بتناقى نفسك وبكرة كل حاجة تيجى فوق دماغك انتى
عشان انتى ماشية غلط تفكيرك غلط واللى اتعود انه يعيش فى
الضلمة النور بيوجع عينيه أنا خارجة عشان أحمد قاعد لوحدة
خدى برفان ولبان عشان تضيعى ريحة السجاير عشان أحمد جتكوا
القرف إذا كان انتى ولا هى مفيش فرق بينكم تقريبًا شبه بعض فى
التفكير.. ليه يارب واعدنى باصحاب زى دول

وخرجت فريدة من الحمام وذهبت للجلوس مع أحمد وتركت نور ونهى
للنميمة وفى طريقها للطاولة وجدت عمرو منتظرًا مع أحمد وينظر
إلها من بعيد نفس ذات النظرة الأولى فابتسمت وقالت له : ازيك ؟

عمرو: تمام يا ملاك انتى عاملة ايه ؟

فريدة : الحمدلله تمام

عمرو : هتفضلى واقفة تعالى اقعدى

فريدة : طيب

أحمد: فريدة شاعرة فبلاش تلعب معاها بالكلام وكده

عمرو: بجد وأنا بحب المزيكا بلعب جيتار وكده بللا بينا نعمل باندي بقى

فريدة: كدة مره واحده مش لما اتعرف عليك الأول يلا عرفنى بنفسك

عمرو: أنا يا ستى عمرو 25 سنة اخر سنة حقوق .. فاشل مش بشتغل

وبحب المزيكا وبحب القراية وحاجات كتير هتعرفها بنفسك وانتي؟

فريدة: أنا فريدة !

عمرو: بس كده !

فريدة: تقدر تقول كده

عمرو: انتى مش فريدة .. انتى ملاك بس بطلى فلسفة بتكلم بجد

فريدة: أنا 18 سنة بدرس إعلام لسه أول سنة و بكتب خواطر وكده

بس هما بيقولوا عليها كلام حلو عايز تعرف ايه تانى ؟

عمرو: كفاية كده مؤقتاً

مع دخول نور ونهى أحمد بيسأل نور : كل دة تأخير ما كانش ميك اب

بتصلحوه

نور: معلش بقى كنا بنزغى .. ازيك يا عمرو ؟

عمرو: تمام

نور: أعرفك نهى زميلة فريدة في الكلية وصاحبتى

نهى: أهلاً

عمرو: أهلاً

فريدة: والله طيب كويس اتهنوا ببعض

أحمد: نور مش يلا بينا ؟

نور: اه يلا اتأخرنا

نهى: وأنا كمان لازم امشى

عمور: أنا اجى عشان انتوا تمشوا ؟

أحمد: فى بنات عندهم شبشب بيترفع فى البيت لكن فريدة عادى

مممكن تقعد معاك كمان شوية

عمرو: اشمعنى ؟

فريدة : أصل أنا أهلى متفتحين ما عندهممش الوقت مشكلة عشان

عارفين بنتهم فين و مع مين وكده .. اتأخرتوا يا أحمد يلا اتفضلوا أنا

قاعدة مش عشان عمرو بس عشان كمان هستنى ناس اصحابى
تانيين جايين مع ماما هتوحشونى سلام

أحمد: انتى زعلتى ولا ايه يا دودو مش قصدى

فريدة: السم فى اللسان يا حبيى خد القطعة المغمضة بتاعتك وامشى
عشان الشبشب اللى بيترفع فى البيت

نور: طيب يللا بينا هبقى اكلمك بالليل

نهى: وأنا كمان همشى

نور: طيب تعالى نوصلك بالمره معانا

نهى: ماشى يللا سلام يا فريدة أشوفك بكرة فى الكلية

فريدة: سلام

وذهبت نهى مع نور وأحمد حتى يصطحبوها على الطريق حتى لا تتأخر
وظلت فريدة مع عمرو

عمرو: انتى اتضايقتى من ايه ؟

فريدة: لا ابدًا

عمرو: أكيد أحمد ما يقصدش

فريدة: عادى كل واحد حر فى تصرفاته وأنا حرة محدش ليه عندى حاجة

عمرو: تعرفى انى بحب البننت الجريئة اللى بتعمل اللى هى عايزاه وبس

فريدة: بلاش بكش وغير الاسطوانة أنا حافظة اسطوانات كتير قوى شوف عايزنى اسمعلك ايه منهم

عمرو: طب تعرفى ان انتى حلوة

- شكرًا

- على فكرة أنا والله ما بعاكسك بس انتى بجد غريبة جدًا

- غريبة ازاي ؟

- شدتيني أوى أول لما شفتك ووجد مبسوط انى قولتلك الكلام ده

- صمتت فريدة

- انتى لو اتضايقتى من كلامى اسف والله مش قصدى اضايك وكفاية

انى حاسس بيكى إحساس عجيب محتفظ بيه لنفسى

- لأ أبدًا أنا بس مش لاقية رد

- ليه مش لاقية رد ؟

- عشان أنا قولتلك حافظة كل الاسطوانات لكن مش بعرف ارد عليها
بسمع بس وبتفرج على اللى بعد كده

- فريدة بس أنا بتكلم بجد

- كلهم بيقولوا كده فى الأول

- بس أنا غيرهم

- بكره نشوف كلهم بيقولوا أنا غيرهم أنا غيرهم لكن بيطلعوا اسوء
منهم

- طيب نتكلم بصراحة ؟

- ياريت مبحبش غيرها عشان أنا كمان اريجك

- طيب أنا اتشديتلك من أول نظرة شفتك فيها واقدر اقولك دلوقتى
انى معجب بيكى من أول نظرة زى ما بيقولوا وكنت فاكر انك
مرتبطة بسليم وفهمت ده من أسلوبه معاكى فى الكلام ولما قولتى
انك ما تخصصيش حد فرحت جدًا حسيت ان فى أمل انى أقرب منك
أنا عارف ان دى تانى مرة اشوفك فيها وما أعرفكيش بس بسمع
عنك بس لكن حقيقى أنا محتاج انى أقرب منك

- مبدأياً القاعدة الأولى في علاقتنا .. انت ليك باللى بتشوفه منى .. مش اللى بتسمعه عنى مفهوم ؟

- مفهوم

- ثانيًا : نفترض اننا قربنا واتعلقنا وحبينا بعض وكل الأشياء العظيمة دى آخرها انك تقولى اسف مش انتى البنيت اللى كنت اتمناها والجو ده ؟ اسفة مش لاعبه

- هو انتى ليه بتعاملينى زى أى حد انتى عرفتيه مش يمكن أنا الفارس المنتظر اللى يغيرلك كل حياتك

- القاعدة الثالثة والأهم .. أنا مش بتغير علشان حد انت عجبك فريدة يبقى تحب فريدة زى ما هى غير كده اسفة

- ما أقصدش أصلاً ده

- عارفة أنا بس بحط أساس للعلاقة اللى هتكون بينا أيًا كان أصحاب أو مرتبطين أو أى حاجة من الكلام ده

-الدنيا بتمطر تعالى ..

-على فين ؟

-هتعرفى حالاً

واخذ عمرو فريدة ليخرجوا خارج المقهى ليرقصوا تحت المطر للرقصة الثانية في عهد حيمم وعندما ينتهى المطر قبَّلَهَا القبلة الأولى فتففيق على تصفيق الناس لهم ولأول مرة تشعر فريدة بالخجل فى حياتها !

فريدة: ايه اللى انت عملته ده ؟

عمرو: اسف بس حسيت انى كان لازم اعمل كده

فريدة: انت ازاي عملت كده

عمرو: واضح انك لسة تحت تأثير المخدر

فريدة: مش عارفة اقولك ايه أزعقلك على اللى انت عملته ولا أقولك ايه

عمرو: ما تقوليش أى حاجة أنا اسف

فريدة: لازم نمشى

عمرو : نروح فين ؟

-لازم اروح لمامتى

- طيب أوصلك

- لأ هعرفك عليها

- من أولها كده تديسة

- هو انت تطول اصلاً يا شاطر

- لاأ طبعاً بس سؤال مامتك حلوة قوى زيك كده ؟

- هي الأصل يللا ولا ايه ؟

- ماشى يللا

طوال الطريق فريدة تسرح فيما قاله لها عمرو .. خائفة من أن يكون مثل أى شاب مرَّ عليها في حياتها تريد أن تعرف كيف يراها ولا تستطيع أن تسأله عن أى شيء فقالت لنفسها أنها يجب أن تجمد مشاعرها حتى تتضح الأمور.

طوال الطريق عمرو يحدث نفسه ويقول .. الكل يشعر أنها كل شيء وهي تؤمن أنها لا شيء ليتها تؤمن أن لا شيء منها بكل شيء من غيرها ويسأل نفسه ويقول: هل تقبل أن أكون في حياتها ؟ ليتها تعلم كيف حالي من بعد أن وقعت في حيا .. ليتها تعلم أن عيونها بحر وما كان الغريق إلا أنا .. ليتها تعلم أن شفيتها ليست كأى شفاه .. شفيتها خمر وما كان السكير إلا أنا

فتقطع فريدة حبل افكار وتقول له : عمورى احنا هنقف هنا

عمرو: عمورى ؟ حلوة أوى منك

فريدة: الأصل أنا لما بقرب من حد بحب ادلعه فى مانع ؟

عمرو : لأ خالص يا بطوطى

فريدة : حلوة بطوطى دى يلا بينا ماما قاعدة هنا

عمرو : تعرفى انى بعشق المكان ده

فريدة: ده مكانى المفضل أنا كمان

عمرو: يعنى لوفى يوم افترقنا وحببتى تشوفينى هتيجى هنا هتلاقينى

فريدة: أنا لما حد بيعب يشوفنى بيعرف أنا فىن و بيعبى وده مكانى

قبليك يعنى لو شفتك هنا يبقى انت اللى جاى تدورّ عليا مش أنا

عمرو: ماشى يا غلباوية

فريدة دخلت أولاً وجلست بجانب والدتها وأشارت لعمرو ليجلس

وعرّفتهم ببعض وقالت :

ماما ده عمرو اللى حكيتلك عليه امبارح

أفنان: اهلاً

فريدة : عمرو ودى أفنان بقى مامتى الصغنونة

عمرو : أنا مستغرب أصلاً ازاي دى مامتك شكلها صغير قوى على إنها تكون ماما يعنى ممكن تكون أختك الكبيرة ماشى

أفنان: هههههههه عادي احنا متعودين على كده بس الحقيقة انها بنتى

عمرو: حضرتك على كده اتجوزتى صغيرة قوى

أفنان: اتجوزت 17 جيبتهـا 18 وحط عليهم كمان 18 كده عرفت سنى

عمرو: 36 صغير جداً على إن حضرتك يكون عندك عروسة جميلة زى فريدة

فريدة : عروسة !

عمرو: أحلى عروسة

أفنان: شكلك كلامنجى بس دمك خفيف

عمرو: دا أنا غلبان

وطال الحديث بين فريدة وأفنان وعمرو حتى طلوع الشمس وأدرك عمرو أنه وقع فى حب هذه العائلة الصغيرة بكل ما فيها من جمال

وقبح مميزات وعيوب وأخذ قرار بأنه سوف يكون هو رجلهم الذى
يثقون فيه ويتحمل عنهم الكثير من المتاعب

وفى مساء اليوم التالى بعد أن استيقظت فريدة وجدت أن عمرو
اتصل بها 5 مرات فقررت الاتصال به فى اخر اليوم لأنها كانت
منشغلة جدًا بمشروع يجب أن تسلمه فى الجامعة غدًا وعندما
انتهت فريدة كل شىء اتصلت به فردًا وقال:

- عامله ابيه يا ملاك؟
- مفيش حد ملاك
- انتى ملاك بالنسبالى عامله ايه ؟
- الحمدلله انت اخبارك ايه ؟
- الحمدلله ايه اللى مسهرك ؟
- كنت طول النهار نايمة ولما صحيت خلصت حاجات للكلية وبس
- وبتعملى ايه فى ليلك ؟

- كنت بكمل كتاب سايباه بقالى فترة قلت اقراه افكرت انى مكملتوش قولت اكمله

- طيب ده الليلة وبقاى الليالى ؟

- على حسب أجيب فيلم أبيض واسود أو أسمع أغانى أو اقرأ زى ما بتطلب انت سهران ليه بقى ؟

- أنا سهران من كتر التفكير والتفكير وساعات ودة قليل جداً التفكير

- طيب وبتفكر فى ايه ؟

- هى دى المشكلة بفكر فى كل حاجة فى نفس الوقت لحد ما الفيوزات كلها لسعت

- دى مشكلة كبيرة فعلاً .. بس فكر فى الأهم أو بمعنى أصح الأولويات

- ما هو كلها أولويات متعلقة بالمستقبل

- لا بس فى أهم الأهم

- وساعات بحس انى محتاج اعمل حاجة مجنونة اشد بيها فيشة دماغى

- طيب لما بتحب تعمل حاجة مجنونة بتعمل ايه ؟

- طيب وبعدتوا ليه ؟

- هو ده المغزى هى كانت girlfriend بس مش بالمعنى المتعارف عليه

- لا أنا بتكلم على المعنى الغربى مش هنا فى مصر

- كنا اصدقاء جداً قرييين من بعض جداً بس ما كانش فى بيننا الحب الرومانسى كان فى بيننا إعجاب وراحة من نوع خاص

- فهماك

- وقت ما تحتاجنى بتلاقينى والعكس, كنت بحافظ عليها جداً خصوصاً إنها كانت آنسة والعلاقة كانت معقدة بس بيننا سلسلة

- كنتم محتاجين بعض بس فى إطار معين, علاقة مش أى حد ممكن يستوعبها وخصوصاً فى مجتمعنا

- بالظبط خصوصاً اننا كنا بنشترك فى إننا مش حايين نكون كلاب فى موسم تزاوج.. أقصد مش مع أى حد وفى أى وقت وخلص

- فاهمة

- وهو ده اللى مخليها صعبة الحدوث مرة اخرى.. قابلت ناس عندها نفس الفكر بس ما كانش فى راحة متبادلة

- هو صعب فعلاً انك تلاقى راحتك مع حد بسهولة
- وبالتالي كان الموضوع هيبقى حيوانى خالى من الإنسانية
- طيب هى البنت دى راحت فىن أصلاً ؟
- اتقدملها عريس أعجبت بيه واتخطبت وأنا احترمت رغبتها وسيبتلها مساحة.. حبه واتجوزوا. ساعات بتكلمنى كل كام شهر تظمن عليا وتظمنى عليها وببيكون كلامنا فى حدود مش زى زمان وأنا حبيت إخلاصها
- دى حاجة كويسة
- عشان كده كان صعب انى أعمل فكرتى المجنونة
- بس فى جنان أنواع تانية
- زى ؟
- زى انك تمشى تحت المطر وانت عارف انك هتتعب وزى انك تخرج الفجر لوحدهك تغنى بصوت عالى وانت صوتك وحش زى حاجات كتير ممكن تكون بسيطة بس بتخرجك من المود لو معاك ناس شيهك أو حتى لوحدهك, زى إنك تعمل أى حاجة نفسك فيها من غير ما حد يقولك عيب وحرام أو الشكل العام والهجص ده

- بصى انتى عشان بنوتة ف 90% من الحاجات اللى ذكرتها بالنسبالي
بقت حاجات مملة من كتر ما اتكررت وفقدت تقريبًا أثرها العلاجي
لكن الإسلوب اللى قولتهولك كان ليه فى نفسى أثر السحر

- انت برج ايه ؟

- من غير ما تتخضى والنبي

- لأ قول

- اوعدينى الاول انك مش هتشمئزى

- أوعدك

- عقرب

- حسيت, للمعلومة رجل العقرب جميل جدًا

- ربنا يكرمك أول إنسانة بجد ما تخافش لأ وتقول كلمة حلوة أنا بكِ
أسعد ولكِ قلبى يطرب

- طيب خمن أنا برج ايه وانت تعرف أنا ليه بجب برج العقرب

- الميزان ؟

- لا

- القوس؟

- اه

- يعنى أنا افكارى مش شريرة ولأ شريرة

- لا مش شريرة

- طيب جنونى ده عادى ؟

- ايوه عشان كدة حسيت انك عقرب

- انتى كان ليكى تجربة من النوع ده ؟

- لأ

- شفتى مش قولتلك

- بس عشان أنا بخاف من الحب بخاف أقرب من حد

- تقريبًا أنا الوحيد اللى من النوع ده والمفروض أروح أموت

- لأ فى زيك كتير

- ليه .. الخوف بيدمر الحياة بيخلى الإنسان ما يعرفش يعيش مهما

عاش بيفضل خايف

- مش بخاف من أى حاجة فى الدنيا غير الحب وده موضوع يطول شرحه

- علشان ما يكونش فى أذى نفسى أو جرح؟

- لا مش كده, أنا أكثر واحدة اتأذيت بسبب الحب يمكن أكون صغيرة بس شوفت كتير قوووى عشان كده قبل ما حد يفكر تلاقينى ببعد مجرد ما اللى قدامى أحس انه بيكِنّ مشاعر ليا أهرب علشان بوجعه لو فضلت أعرفه

- أكيد حظيتى ثقتك وقلبك لناس ما تستحقش

- بالعكس كان الإنسان المناسب وغير مناسب فى الوقت نفسه

- ما أعتقدش ان الرقة دى تعرف توجع

- للأسف وجعت ناس كتير جدًا علشان كده بخاف أقرب من حد وأى حد بيقترب منى بيبقى فى عهد ما بيننا لو هنكون أصدقاء بلاش يحبني لأن ظروفى ما تسمحش إن يكون فى حد فى حياتى وأسباب كتير قوى موضوع يطول شرحه

- ما تقلقش اه انتى تتحبنى بس أنا من كتر برضو إلى شوفته عرفت فين الفرامل بتاعة المشاعر بس ليه ما فكرتيش فى جنان شبهه جنانى؟

- ليا وجهة نظر

- نفسى الإنسان اللى يخلىنى عايزه معاه ده يبقى هو الإنسان اللى يعرف يحتوينى ويوصللى وهو الإنسان اللى أكمل معاه باقى عمرى وده صعب الأقيه فى الوقت الحالى, أنا متعددة العلاقات والمعارف لكن مش عايزة أكون متعددة التجارب لكن فى الوقت ذاته باخد خبرة من كل تجارب إلى حواليا مفيش تجربة بشوفها من غير ما أأخذ خبرة منها

- وجهة نظر تحترم ويمكن أنا عرفت وأكيد مش لوحدى اننا ناخذ إيجابيات الموضوع ونبعد عن السلبيات وده اللى خلى الموضوع ينجح ومن غير أى أذى للطرفين

- بس يا سيدى

- عرفتى ليه بقى جنانى صعب ؟

- عرفت بس ما قلتليش بقى كنت بتفكر فى ايه ؟

- فى انى نَفْسى أكون إنسان الاقى شريكة حياتى بما فى ذلك من شغل وشقة والخ

- اممم

- هسيبك دلوقتي متمنيًا لكي ليلة لذيذة وأحلام سعيدة لأحلى عيون
خلقها رب الكون

- ماشى يا سيدى تصبح على ألف خير

كان عمرو يريد أن يعرف أسرار كثيرة عن حياة فريدة فحَبَّ يردش
معاها بأسلوب غير مباشر حتى يستشف من إجابتها أجوبة لأسئلة
كثيرة تحوم في عقله وكانت فريدة تعلم ذلك لذلك تكلمت معه بكل
صراحة ولكن من الغريب أنه لم يسألها عن الإنسان الذى بسببه
تخاف الحب كانت تظن أنه أدرك انه شخص كانت هى تحبه ولكنه
لا يعلم أن ذلك الشخص هو والدها وأنها معقدة من علاقته
بوالدتها لذلك هى خائفة من أن تحب.

وفي الصباح الباكر من اليوم الثانى اتصل عمرو بفريدة ليطمئن عليها
واتفقا أن يتقابلا بعد أن تنتهى فريدة من محاضراتها فوافقت وبعد
ان أنهت فريدة كل المحاضرات ذهبت إلى المكان المحدد فى الميعاد
المحدد الذى اتفقا عليه فوجدت عمرو بانتظارها فعندما نظر إليها
قال لها :-

- تقريبًا صباح لذيذ على عيونك يا ملاك

- صباح الورد، عامل ايه ؟

- بخسر طول ما انتى بخير
- أنا وانت أمين نارب
- بس ايه الحاجات الحلوة دى أكيد دى عينة من سلسلة روائع
- انت لسة شوفت حاجة, تدخن ؟
- سادة ولا محشية ؟
- سادة طبعاً ميرت أصفر
- أصفر كمان مش أزرق
- ما بغيرش
- طيب أنا بشيش مبدأياً
- طيب شوف عايز تشيش ايه
- ليكى صورة خداعية خارقة
- أى واحدة ؟
- تقفين فيها على شاطئ البحر وتداعب أقدامك المرمية حبات الرمال
- ترتدين فيها فستان أزرق اللون

- شفيتها فن ؟

- على facebook وعملتلك إضافة بس شكلك لسه ما فتحتيش

- دى حقيقة

- Perfect, magnificent ومش لاقى كلمة بصراحة توصف اللي عايز
أعبر عنه تجاه الصورة دى

- مش محتاج

- اعذرينى بس صعب إنسان يشوف جنة وما ينمهرش وأنا كهير انهبرت

- طيب

- بجد أنا مبسوط إنى عرفتك ربنا ببارك فيكى انتى أنثى

وكل امرأة أنثى ولكن ليست كل أنثى امرأة

وعلى فكرة أنا مش شرير على ما أعتقد لأنك قابلتِ أشرار كثير أكيد

- مين قال إنك شرير؟

- كتر بحس انى شرير ممكن أفكارى الشمال بتخلينى احس بكده بس
برجع أقول لنعفسى أنت عمرك ما جرحت حد ولا أذيت حد يعنى
بطبطب على نفسى تقدرى تقولى كده

- بس دی مش طبطبة دی الحقیقة

- ربنا یكرمك، بس أنا أفكاری مش عارف متحررة شوية ومطرطشة ساعات وده بالنسبة لناس كتیر وحش

- لأن صوابع ایدیک مش زی بعضها والناس کمان مش زی بعضها

- کل الناس بیقولوا کده واللی بیعرف فہم أفکاری بیقول إما أنا شریر أو شریر والرأی التالت إنی شریر

- لأ خالص ما تقولش علی نفسک کده انت جمیل

- انتی الی ملاک والملايكة مش بتشوف حد وحش

- تفتکر؟

- ما أنا قلتک بالنسبالی انتی کده، یعنی مثلاً انتی فی الظاهر بیان انک متحررة بس انتی مش کده. أنا العکس بیان انی مش کده بس من الداخل کده وده سبب المشاکل

- انت صح

- أى خدمة

كان عمرو يحاول أن يثبت لفريدة أنه لا يريد منها أى شىء إنما هذا هو أسلوبه الطبيعى وكانت فريدة يوم عن يوم تتعلق به وكانت تعلم أنه لا ينظر إليها نظرة سيئة اى نعم هو معجب بجسدها لكن هو معجب بفريدة أولاً قبل أن ينظر إليها كأنثى وكانت فريدة تحب طريقة حب عمرو وإعجابه بها بشدة وبعد ما انتهى اليوم وأوصلها إلى المنزل نامت فريدة ساعات قليلة واستيقظت لتكلمه, أصبح شىء أساسى أن تسمع صوته ليلاً ونهاراً وأن تكون معه دائماً فاتصلت به

- مساء الخيرات على أميرة الأميرات

- مساء الورد

- لسة صاحية ولا ايه ؟

- ايوه

- صباح السعادة

- صباح الورد

- وبنوتتنا عاملة ايه ؟

- الحمدلله انت عامل ايه ؟

- يارب دائماً يا غالية , أنا الحمدلله

- اقولك سر؟
- قولى
- أنا بحب كلمة غالية دى جدًا
- عيونى وأنا بحب اللى الغالية تحبه
- أخبار الغالية ايه ؟
- الحمد لله
- مالك ؟
- ابدأ صاحية مقريفة
- محتاجة فنجان قهوة وعود من الدخان؟
- يمكن
- طيب قومي اجهزي على ما أعدى عليكى
- هنروح فين ؟
- لما نروح هتعرفى

- بس أنا مرهقة للغاية

- ليه كده

- مش عارفة أناام كويس بقالى فترة وعندى صداع

- كافيين كتير وسجائر أو إرهاب فكري؟ أيهما تفضلين مولاتي ولماذا؟

- كافيين كتير وسجائر من غير أكل بقالى كتير كده

- مش هينفع كده أقولك حاجة.. بلاش.. هتدبلي

- بس أنا مش وردة عشان أدبل

- فى عيونى وردة.. وأكيد فى عيون الآف زبي وأحسن منى شباب وبنات

وناس كبيرة شايفينك وردة

- توء

- هو ايه اللى توء؟

- مفيش حد بيدشوفنى وردة غير أمى وحاليًا انت

- يبقى الحمد لله طلعت بفهم.. بجد ده اللى انتى شايفاه ولا ده اهتزاز فى

ثقتك

- لا ده اللى أنا بحس بيه وبشوفه فى عيون اللى حواليا أنا فى نظرهم
بنوتة صغيورة يا إما فريسة بيحاولوا يفترسوها ومش بيعرفوا .. انت
جاي من عالم تانى

- ودة الطبيعى فى حياتنا بس مش معنى ده ان مفيش ناس كتيرة حلوة
والحلاوة والطيبة اللى جوا الناس بإيدينا احنا نطلعها ونخليها تظهر

- وليه ما أبعد من الأول أحسن

- ودة حل أكثر أنتخه دماغية

- ايوه

- وموضوع الفريسة ده هتقابليه كتير للأسف, أتمنى انك تكونى فريسة
للى يحافظ عليكى ويسعدك ويخليكى تحسى بمكانتك كملكة متربعة
عرش عالمه

- متعودة أقابل, بس أنا مش عابزه أدخل القفص أصلاً

- للأسف مش بإيدينا كل حاجة بتحصل غصب عننا وكل مرة بنقول
لنفسنا كده زى اللى كل يوم بالليل يقول أنا هبطل سجائر بكرة
ويقوم يشرب عادى.. القفص موجود موجود يا ولدى بس لسه
معداش على العنوان

وبعد هذا الحوار بين فريدة وعمرو تمنى عمرو أن تكون فريدة داخل قفصه ملكة تترىع عرش مملكته وتمنت فريدة ذلك أيضاً لكنها تخاف جداً ويوجد بداخلها صراع ما بين أن تفتح باب قلبها لعمرو أم تُجمّد مشاعرها وتبتعد ولكن فات الميعاد..

الخوف من الحب هو دائماً اعتراف بسيطرة هذا الحب علينا فنحن حينما نخاف من أن نحب شخصاً نكون في الواقع قد أحببناه بالفعل وانتهى الأمر.

وهذا ما حدث بين فريدة وعمرو و مع مرور الوقت أصبحوا كيان واحد لكن في جسدان مختلفان .. تغيروا باسم الحب ..فريدة لا تخطو خطوة واحدة بدون عمرو وهو كذلك ومرّ عام وهما معاً حقاً اسرة صغيرة كان عمرو قد ملأ الفراغ الذى كان يشغل حياة فريدة أصبح والدها وأخ لها وابنها وصديقها وكل شيء فى هذه الدنيا كانت فريدة تعيش مع عمرو دنيا من أول وجديد كانت جائعة للحب وكان عمرو هو الوحيد الذى يُشبع جوعها كانت تستيقظ يومياً تذهب إلى الجامعة وبعد ذلك مع عمرو طول النهار حتى تذهب إلى البيت لتنام ثم تذهب إلى الجامعة فى الصباح على هذا الحال يومياً منذ أن عرفت عمرو.

وفي عيد الحب قرر عمرو حزم مكان بأكمله للاحتفال مع فريدة بعيد
الحب سويًا وعندما دخلت فريدة قال عمرو: اتفضلي أنا حجتلك
الجزء ده كله علشان تختارى تحبى تقعدى فين

فاختارت المكان فريدة وقالت: هنا أنا بحب الترايزة دى

عمرو: عشان أول خروجة خرجناها قعدنا عليها ؟

فريدة: بالظبط كده

فقبلَ عمرو يد فريدة وقال لها : كل عيد حب واحنا مع بعض

فريدة: تعرف يا عمورى .. مش لاقية كلمة حب جوايا تعبرلك عن اللى
عازه اقولهولك لأن اللى جوايا ليك كتير قوى

عمرو: كلمة واحدة بس اللى بعيش بيها وحشْتنى قوى نفسى أسمعها
منك .. قولها بقى

فريدة: ايوه بحبك .. خلاص ارتحت

عمرو: غمضى عنيكى

فريدة: توء

عمرو: وحياتى عندك

فأغمضت فريدة عينها

عمرو: خلاص فتّح

فريدة: مش هفتّح

عندما فتحت فريدة عيونها تفاجأت بهدية عمرو لها خاتم مكتوب عليه اسمه فابتسمت بابتسامة حب وألبسها عمرو الخاتم ثم قبّل يديها من الداخل مرة أخرى وضمّها إلى صدره فاحتضنته فريدة بشدة فقال لها: ربنا ما يحرمنى منك

فريدة: ولا يحرمنى منك أبداً

عمرو: توعدينى ان مفيش حاجة فى الدنيا ممكن تفرقنا عن بعض

فريدة: أوعدك

وكانت هذة الأيام أجمل أيام فريدة بالعمر كانت كالزهرة فى الربيع متفتحة ومليئة بالنشاط والحيوية وكانت أيامها مع عمرو كلها مليئة بالحب حتى اقترب موعد عيد ميلادها.

وفى يوم من الأيام قبل عيد ميلاد فريدة بفترة قصيرة اتصلت أفنان بعمرو وطلبت منه أن تقابله دون علم فريدة تريد التحدث معه فى أمر مهم فذهب عمرو إلى المكان وكان الحوار كالتالى :

- انت عارف يا عمرو أنا عايزاك في ايه ؟

- لأ بس أى حاجة انتى عايزانى فيها أنا تحت أمرك انتى عارفة يعنى

- بص يا عمرو أنا أول مرة أشوف فريدة مبسوطه كده في حياتها وده مخوفنى

- انتى خايفة على فريدة منى ؟

- لا ما أقصدش أنا عارفه وشايفة انت بتحب فريدة قد ايه بس البنات في السن دة بتبقى مشاعرهم أقوى من أى وقت تانى خايفة يحصل حاجة وتوجع فريدة عايزه أعرف انت ناوى على ايه مع بنتى

- أكيد أنا مش في حياة فريدة علشان أوجعها وأكيد أنا ناوى ان فريدة تكون في بيتى في يوم من الأيام أكيد أنا مش بلعب ويومين وهبعد أنا لما اتعرفت عليكم لقيت فيكم العيلة اللى أنا كنت بدور عليها رغم انكم اتنين بس لكن علاقتك بفريدة مش زى أى أم وبنتها وده أنا حبيته وربنا يعلم أنا من أول ما عرفتكم وأنا ناوى أكون راجلكم وأكمل الفراغ الناقص في حياة فريدة

- ربنا يظمن قلبك قولى بقى عيد ميلاد فريدة قرب بفكر نعملها مفاجأة كبيرة ايه رأيك

- بصى أنا كنت ناوى ان يوم عيد ميلادها يبقى يوم تتويج حبنا
وافاجأها اننا هنقرا فتحتنا بومها ايه رأيك ؟

- رغم انى ما كنتش أتمنى إن بنتى تتجوز بدرى ولا كنت أتمنى انها
تتجوز قبل ما تحقق طموحاتها بس أنا متاكدة ان وهى معاك
هتتحقق كل حاجة هى نفسها فيها

- حلو جدًا يبقى هنتفق على كل حاجة ونرتب كل حاجة عشان أنا
موجود فى الدنيا دى عشان بس أسعدها

- اتفقنا على بركة الله يا زوج بنتى المستقبلى

- لا أنا علاقتى بيكى مش زوج بنتك بس أنا ابنك الكبير ولا ايه يا كبير

- طبعًا يا حبيبى

وبعد هذه المقابلة اتفق أفنان وعمرو على كل شىء ولكن أنا أريد وأنت
تريد والله يفعل ما يريد

وفى عيد ميلاد فريدة ال 19 كانت تعد أفنان وعمرو المفاجأة الكبيرة
لفريدة ودَعَوَا كل أصدقاء فريدة وعمرو المشتركين حتى سليم وكانت
فريدة وسليم لا يتحدثون مطلقًا من ذلك اليوم الذى صرَّح فيه
سليم بمشاعره لفريدة وهى رفضت وقد كان. اتصل به عمرو

للدعوة على عيد ميلاد خطيبته وقراءة فتحتهما معاً وسليم لا يعلم من هي ولا يعلم أنها حب عمره .. فريدة.

وقد كان أحمد ونور ونهى يعلمون بهذه المفاجأة ولكن لا أحد يمكنه أن يخبر فريدة كل ما تعلمه فريدة أن عمرو قام بدعوتهما على العشاء في مكانهم الذي يحبوه وهو فندق على البحر وقد زُين الرمال بالشمع والورود وجهاز المكان ليهر فريدة ليصرح لها أن اليوم هو ليس عيد مولدها فقط لا بل عيد تتويج حبهام معاً وليتقدم لخطبتها ويلبسها دبلته التي سوف تحمها من عيون الناس ليعلموا أنها تخص رجل واحد على وجه الأرض.. رجل غير كل الرجال, رجل استطاع أن يصل إلى قلب أصعب امرأة على وجه الأرض من وجهة نظرة.

وكانت فريدة على الجانب الآخر تفكر ماذا سوف يفعل عمرو لها في ذكرى حبهام الأول وعيد مولدها, كانت تريد أن تقول له كلمات كثيرة فأغمضت عينها لثواني وتخيلت اليوم وهما جالسين بمفردهم في النصف الآخر من ديسمبر وليلة قارصة البرودة وهي تختبئ في ضلوعه من البرد تسرح بخيالها تقول له :

أريد ان أحتضنك بشدة لدرجة لا أستطيع أن أميزها ضربات قلبي عن ضرباتك

وأريد أن أقبلك بشدة لدرجة لا أستطيع أن أميزها أنفاسي عن أنفاسك

وأريد أن أحبك بشدة لدرجة لا تستطيع روي أن تحتمل غيرتها منك

بأنى وجدت من هو أعلى منها فيضمها أكثر إلى صدره وتغمض عينها
لتنال قسطاً من الراحة داخله لتوقظها نهى من غفوتها وتدخل
عليها غرفتها وتقول: الجميل سرحان فى ايه؟

فريدة: مش عارفة هلبس ايه محتارة بين فستانين

نهى: عايزاكى تبقى موزة جداً ورينى محتارة بين أى اتنن وأحاول
أساعدك

فريدة: الإسود ولا الأحمر الغامق ده ؟

نهى: اسود ايه حرام عليكى هتنكدى على الواد ليه بس سؤال بقى بجد
انتى ازاي حبيتى عمرو كده وهو بيحبك كده ؟ انتى ما كنتيش كده
ولا هو كان كده يعنى انتى وعمرو مش زى نور وأحمد نهائى ليه ؟

فريدة: بصى يا ستى أنا وعمرو مش هنكون زى أى اتنين عشان احنا فى
النور وما اتغيرناش عشان بعض احنا الحب هو اللى غيرنا وحبينا
بعض بعيوبنا قبل مميزاتنا أنا عن نفسى عمرى ما كنت أتخل انى
اكون مع حد كده أصلاً ده كان فى الأحلام بالنسبالى واللى عيشته مع
عمرو مستحيل يكون بين أى اتنين عاديين أصلاً أنا وعمرو فاهمين
بعض من غير ما نتكلم من غير ما يطلب حاجة أنا بنفذهما بيخاف
عليا عشان الخوف بجد مش عشان ده واجبه حابب كل حاجة فيا

وأجن منى بنعمل مع بعض كل حاجة احنا بنحيا احنا بالنسبة
لبعض مش اتنين مرتبطين وخلص لأنا بنته و مراته و حبيبته و امه
واخته وكل حاجة حتى لما بيعمل حاجة غلط بيعي يحكيلى ومش
بيخاف انى ازعل على قد ما بيبقى مش عارف يحكى لحد غيرى وأنا
بقدر كل حاجة بقدر انه بيعي يصارحنى مش أعرف من برا وانكد
عليه والكلام ده كله مش بيغير من أصحابنا عشان هما أصحابى أنا
هو ما بقوش أصحابى أنا بس عشان هو عارف هو عندى ايه بجد.

أما نور وأحمد حاجة تانية خالص شوفى على قد ما هما بقالهم قد
ايه مع بعض أنا عارفة انهم مش هيكملوا عشان أسلوبهم غلط فى
التعامل مع بعض سواء نور أو أحمد، نور بتعمل كل حاجة عايزاها
من وراه و أحمد نفس الموضوع بيرسموا الحب من برا وبيحاولوا
يصدقوه لكن فى الحقيقة مش كده كل اللى أقدر اقولهولك يا نهى
ان ربنا يوعدك بواحد زى عمرو بالنسبة ليا عشان ما تبقيش
خايفة تعملى حاجة قدامه لا يفهمك غلط والكلام الفاكس ده
وتبقى معاه على طبيعتك مش محتاجة انك تكونى مصطنعة أنا
نفسى تحبى وتدى فرصة لنفسك انك تعيشى مش تستنى نصيبك
وخلص انتى كويسة من جوا .. حطى الناس وراكى عشان انتى تبقى
قدام عشان طول ما انتى حطاهم هما الأول انتى هتبقى فى الآخر ورا
خالص وهتلاقى العمر مربيكى واتجوزتى واحد مش بتحببه وجبتي
منه اولاد وتيجى على نفسك عشان خاطر ولادك وبس وتنسى نفسك
.. حطى امى قدامك حطى أفنان وحياتها قدام عنيكى واوعى تغلطي

غلطها انتى اتخلقتى عشان يكون ليكى دور فى الحياة غير تعمير الأرض .. رسالتك اكبر من كدة يا نهى ما تفكريش زى نور !

نهى: انتى عارفة سبب قربى منك ايه ؟

فريدة: ايه ؟

نهى: انك واضحة مع نفسك عشان كدة ما يهيكيش حد بس الى زيك ما ينفعش يبقى فى مجتمعنا الى زيك المفروض انه يعيش برا بس الكلام ده لو ما كنتيش لقيتى حد شيهك زى عمرو أما أنا انسانة عادية روتينية لا عايزة أكون زى نور ولا قادرة أكون زيك .. أنا زى اللي رقصت على السلم فى النص لا عارفة اكون فى النور فى كل حاجة ولا قادرة أعيش فى الضلمة وسط الخوف وسيبك بقى من الهرى ده واجهزى الليلة ليلتك يا معلم وأنا لازم انزل دلوقتى عشان عندى فرح

فريدة: فرح مين ؟ مقولتيليش يعنى !

نهى: ماهو أصل نسيت فرح واحدة صاحبتى ما تعرفيهاش قولى لأفنان تسكّ ع الغدا يلا سلام

فريدة: مش مرتاحة ليكى بس ماشى بكرة افوقك يا جميل سلام

أفنان: نهى مش هنتغدى ؟

فريدة: لأ بتقول عندها فرح

أفنان: وانتي نازلة ؟

فريدة: اه عمرو عازمني على العشا

أفنان: بمناسبة ايه ؟

فريدة: بصى فى النتيجة يمكن تعرفى

أفنان: انتى مش عارفة ان أمك عندها زهايمر على العموم ما تتأخريش
عشان عايزاكى بالليل تنفضى معايا البيت عشان الشغالة مش
جاية بكرة

فريدة: هتأخر وبعدين سيبنى البيت من امتى احنا هنفض مش
شغلطنا يا حبيبتي احنا هوانم مش ده كلامك

أفنان: مش فايقة ليكى باباكي اتصل بيقول انه عايز يشوفك فضى
نفسك عشان تبقى تخرجى معاه

فريدة: وما اتصلش بيا على الموبايل ليه ؟ بيعك يا جميل وعايز يسمع
صوتك ولا ايه

أفنان: فريدة اخرجى من دماغى أنا داخلة انام وقبل ما تنزلى ما
تدخليش عليا عشان الإزعاج

فريدة: دة من امتى ؟

أفنان: اقل على نفسى أحسن يعنى ... تسمى الكلام ماشى

فريدة: خلاص يا قطة تصبى على خير

أفنان: وانتى من أهله

دخلت أفنان غرفتها وأغلقت الباب من الداخل حتى تجهز نفسها لكنها حائرة لا تعلم ماذا ترتدى فى مثل هذا اليوم إنها حقًا لا تتخيل أن صغيرتها أصبحت كبيرة واليوم يوم خطبتها لا تعلم فى هذه اللحظة هل حقًا تحب عمرو أم تكرهه، تحبه لأنه يُسعد ابنتها حقًا أم تكرهه لأنه يأخذ عمرها فى ثوانى ثم قررت أفنان أن ترتدى أجمل فستان لديها وتنتظر نزول فريدة حتى تستطيع أن تنزل وعلى الجانب الآخر فريدة تتلقى اتصال هاتفى من نور لتقول لها عيد ميلاد مبارك وكل عام ونحن أصدقاء وتساءلها ماذا ستفعل الليلة فتقول لها فريدة أن عمرو يدعوها على العشاء فى البراديس معمورة على أضواء الشموع على البحر مباشرة ويتذكرون أول مرة ذهبوا إلى هذا المكان معًا ويتذكرون عُمر صداقتهم وتغلق فريدة الخط وتأخذ حقيبتها وتنزل لتذهب إلى عمرو فى ميعادهم المحدد.

عمرو كان قد أوشك على الإنتهاء من التجهيزات كلها هو وأحمد ونور ونهى وفى انتظار فريدة وكان المخطط أن ميعاد عمرو وفريدة يسبق ميعاد الحضور بساعة حتى يستطيع أن يتحدث معها كثيراً قبل أن يفاجأها بكل شىء وعندما انتهوا من التجهيزات قرر أحمد ونور ونهى أن يذهبوا للجلوس على حمام السباحة الخاص بالفندق حتى لا تراهم فريدة قبل الدخول وينتظرون الناس حتى يكتمل عدد الحضور ويذهبوا لفريدة وعمرو وكان كل شىء على ما يرام حتى وصلت فريدة وبالفعل ذهلت من كل الترتيبات الذى نفذها عمرو من أجلها وسألته لماذا يحجز المكان بأكلمه لهم سويًا فقط فقال لها بمنتهى العفوية : حتى أقبَلِكِ قبل أن تبدأ الحرب !

فقالته : أى حرب ؟

فقال : حرب العمر

فقالته : إذًا قبَلِي قبل أن تبدأ الحرب يا عزيزى!

وبعد اقتناص القبلة قال لها : فريدة بتحبيني ليه ؟

فريدة: لو كنت اعرف بحبك ليه كنت قدرت أتغلب على كل الأسباب
وابعد عنك

عمرو: ما كنتيش عايزه تقربى ؟

-مش كدة بس الحب ضعف وأنا عمري ما كنت أحب انى أكون
ضعيفة لكن الموضوع معاك مختلف

-ازاى ؟

-حبك بيقوينى مش بحس انى ضعيفة

-بحبك

-وأنا كمان بحبني وبحبك

-اشمعنى بتحبى نفسك ؟

-انت إلى خليتنى احب نفسى قوى كده من حبك لها

-لدرجة دى ؟

-انت كنت تتخيل أصلاً انى أكون معاك بالشكل ده تبقى انت اللى
بتكفينى عن كل حاجة فى الحياة ؟

-بصراحة لأ بس عمري ما حسبتها وأنا معاكى يعنى عمري ما كنت
بهتم بيتقال عليكى ايه او انتى بتفكرى ازاى أو لبسك أو كل الحاجات
دى اللى انتى كنتى مشهورة بيها كان كل همى انى ابقى معاكى وبس

وعمرى ما كنت أتخيل انك تستكفى بيا فى الحياة وانا كمان استكفى
بيكى

-ربنا يخليك ليا

-ويخليكى ليا ولا يحرمنى منك ابداً

رن هاتف عمرو برسالة من أحمد مكتوب فيها: "قدامك 5 دقائق
ونكون عندك انجز!"

-المهم !

-قبل المهم فى سؤال معين لازم تجاوبينى عليه حالاً!

-ايه ؟

-تتجوزينى يا فريدة ؟

ابتسمت فريدة وعيناها لمعت من شدة الفرحة وقالت بخجل :أكيد

ثوانٍ قليلة ودخل أحمد ونور ونهى وأفنان وأبيها و والد عمرو ووالدته
وأصدقاء مشتركة كثيرة فتعجبت فريدة من وجودهم وسألته : ايه
ده ؟

عمرو : مش انتى وافقتى يللا بينا بقى نتجوز

فريدة: انت مجنون ؟

عمرو: هو اللى يعرفك ازاي يبقى مش مجنون يا قلبى ؟

فريدة: أنا مش مصدقة انت بجد مجنون

عمرو: مجنون بيكى

وهنا الجميع عمرو وفريدة وقبَلَتْهَا أمها وأبيها وقال عمرو بصوت عالٍ

-يا جماعة النهاردة عيد ميلاد أجمل بنوته فى حياتى وأنا حبيت
اعملها مفاجأة عشان كدة قراية فاتحتنا مش فى بيت العروسة
كالمعتاد مش يلا بينا بقى نقرا الفاتحة ولا ايه ؟

ضحك الجميع وبارك لهم سوياً، ودخل سليم وقد كان متأخراً، اعتذر
عن التأخير وبارك لعمرو وقال له أين عروستك لأبارك لها أيضاً ؟

عمرو ينادى على فريدة ويقولها لها : تعالى سليم عايز يباركك انتى
كمان

سكت سليم وكان فى حالة ذهول تام فقد النطق امامها وجاء فى باله
احلامه التى كان يرسمها مع حبيبة عمره فريدة طال صمته فكسر
صمته صوت فريدة وهى تقول له : مفاجأة مش كدة ؟ الله يبارك
فيك يا سليم مش عارفة اتخرست ليه وضحكت

سليم: معلش اصلى تعبان بتجىلى دوخة كدة.. مبروك يا فريدة عن
اذنك

وذهب سليم ليجلس بعيداً عن العيون حتى لا تفضحه عيونه بالدموع
ليفكر فى شىء ما يبعد عمرو عن فريدة لأنه سرق منه حبيبة العمر!

وعلى الجانب الآخر كانت فريدة سعيدة جداً بكل شىء فى اليوم وتمت
قراءة الفاتحة على خير وبارك لهما الجميع وظلت فريدة مع عمرو
حتى اخر اليوم كانت تنتظر فريدة السماء ايضاً تبارك لها بأمتارها
الغزيرة فى النصف الاخر من ديسمبر حتى ترقص مع حبيبها تحت
المطر وبعد ذهاب الجميع ظلت فريدة تنتظر عمرو ليوصلها إلى
البيت وقبل أن يمضوا أمطرت السماء فظنت فريدة انها تبارك لهم
لكن الحقيقة غير ذلك فقد كانت تبكى.. فرقصت مع عمرو على
أنغام الرعد وضوء البرق وقالت له : عارف بقى ..

-نفسى ليك فى حاجات كتير أوى ..

-نفسى أشوفك أحسن واحد فى الدنيا دى كلها

-نفسى تحقق كل حلم حلمت بيه .. وأنا معاك وجنبك

-نفسى نكبّر سوا .. ومش نفترق فى يوم أبداً

-نفسى تفرح دائماً والحزن ماتعرفش طريقه .. أو ما بعرفش هو
طريقك

-المهم .. انه يبعد عنك وخلص

ظل عمرو يسمعها دون أى تعليق وعندما أنهت فريدة كلامها ضمها إلى
صدره بقوة وفي داخله يقول لها : اه يا فريدة لو تعلمى أنى أكتفى
بكِ ولا أكتفى منك !

فقطعت حبل أفكاره وسألته بماذا يفكر

عمرو: هو ينفذ افكر فى حد غير فيكى !

فريدة: طيب بتفكر فيا فى ايه ؟

عمرو: بفكر فى بيتنا هيكون شكله ازاي

فريدة: لسه بدرى قدامنا سنتين

عمرو: نعم وأنا هستنى لما تخلصى كلية ان شاء الله ؟

فريدة: وانت عايزنى اسيب كليتى عشان اتجوزك ياخويا ؟

عمرو: أنا ما بقولش تسيى الكلية أنا بقول نتجوز وانتي بتدرسى عادى

يعنى

فريدة: لأ طبعاً والاقى نفسى حامل وما أقدرش أنزل الكلية فأضطر
أأجل وبعد كده البيبي يبجى واتشغل معاه وانسى الكلية خالص .. لا
حبيبي بتحبني يبقى تستناني

عمرو: طيب واللى مش هيقدريستنى ؟

فريدة: ليه مش هتقدر تستنى هتموت وتملكنى خلاص بسرعة ؟

عمرو: تصدقنى انتى باردة عشان عايضة تنكدى علينا النهاردة يلا نروح يا
فريدة مش وقته اصلاً الكلام دة

فريدة: أنا شايفه كده فعلاً

بعد أن ركبوا السيارة قال عمرو لفريدة: اسمعى الأغنية دى بقى كل
كلمة فيها أنا بقولها لك

فريدة: بتاعة مين ؟

عمرو: Bruno Mars - Just The Way You Are

فريدة: سمعنى

فقام عمرو بتشغيل الأغنية وفريدة تسرح فى كل كلمة فى الأغنية
وتبتسم وهو يقول

Oh, her eyes, her eyes make the stars look like they're not
shining

Her hair, her hair falls perfectly without her trying

She's so beautiful

.And I tell her everyday

Yeah, I know, I know when I compliment her, she won't
believe me

And it's so, it's so sad to think that she doesn't see what I see

?But every time she ask me do I look okay

I say

عمرو: عايزك انتى تسمعها وتحسها مش هكمل

فريدة: ماشى يا سيدى

وبعد أن انتهت الأغنية كان عمرو قد وصل إلى بيت فريدة فقالت له:
بحبك يا أجمل حاجة فى حياتى

عمرو: وأنا بموت فيكى هرّوح واكلمك

فريدة: هستناك

وبعد أن أوصل عمرو فريدة إلى المنزل جاءه اتصال هاتفى من سليم

عمرو: الوايه يا ابني انت اختفيت من الحفلة روجت فين ؟

سليم: معلش كنت تعبان وكان لازم امشى بقولك ايه عاوزك ضرورى

عمرو: سلامتک يا عم في ايه ؟

سليم: لما اشوفك هقولك فاضى دلوقتي ؟

عمرو: اه أنا لسه موصل فريدة وفي الطريق مروح

سليم: طيب تعالى نتقابل قبل ما تروح تقابلني ع القهوة ؟

عمرو: طيب ماشى مسافة السكة

سليم: وأنا كمان مسافة السكة

أغلق الخط وهو لا يعلم في ماذا يريدہ سليم في هذا الوقت وعلى الجانب الآخر سليم يرتدى ملابسہ حتى يقابل عمرو وهو يفكر كيف يبدأ الكلام معه

فريدة كانت تجهز العشاء لأفنان وعندما انتهوا طلبت أفنان من فريدة
أن تنام بين ذراعها كما كانت صغيرة فدخلت فريدة لتنام في حضن
أمها وتحكى لها كيف كانت سعادتها باليوم

فريدة: عارفه يا ماما أنا عمري ما كنت أتخيل انتى ممكن ابقى كده مع
حد أبدًا

أفنان: على قد ما أنا مبسوطة عشانك على قد ما أنا خايفة عليكي

فريدة: من ايه بس ؟

أفنان: خايفة عليكي تتوجعي عشان كدة هفضل طول عمري سنديك
وضهرك وأمانك

فريدة: ربنا ما يحرمنى منك أبدًا يارب بس أدينى هسيبك بقى عشان
انتى تعيشى حياتك

أفنان: ومين قالك ان أنا عايزه أعيش حياتى بعيد عنك

فريدة: ماهو انتى لازم تعيشى حياتك مش كفاية انك ضيِّعتى عمرك
وحرمتى نفسك من كل حاجة عشانى

أفنان: وهو انتى حاجة أى كلام ؟ أنا لو يرجع بيا الزمن كنت هعيشة
عشانك برضو

فريدة: طيب يلا ننام بصى تعالى بقى انتى فى حضنى يا بنت قلبى

أفنان: ماشى يا مامى

ونامت أفنان فى حضن فريدة وانقلبت الآية أصبحت فريدة الآن هى أم أفنان وظلت فريدة مستيقظة فى انتظار اتصال عمرو حتى تطمئن عليه.

كان عمرو قد وصل للقهوة وسلم على سليم وقال له: ايه يا ابنى فى ايه قلقتنى

سليم: بص يا عمرو انت عارف أنا بجبك قد ايه واحنا اصحاب بقالنا قد ايه بس فى حاجة أنا مش عارف اقولهالك ازاي وفى نفس الوقت أنا لو سكتت هحس بأنى بخون العيش والملح

عمرو: ادخل فى الموضوع على طول كفاية قلق

سليم: فريدة!

عمرو: مالها؟ قالتلك حاجة عنى؟

سليم: لا انت اللى لازم تعرف حاجات كتير عنها، انت شايف انك ما اتسرعتش لما قرئت فاتحتها النهاردة

عمرو: انت جايبني على ملا وشي عشان تسألني السؤال ده ؟ وايه الحاجات الكثير اللي ما أعرفهاش عنها أنا تقريبًا أعرف كل حاجة عنها دا احنا بقالنا سنة مش بنفارق بعض لحظة واللى قبل كده والكلام اللي كان بيتقال ده كله هجص فكك أنا مقتنع

سليم: حتى لو كان اللي قبل ما تعرفها حاجة تخص شرفها ؟

عمرو: بمعنى ؟

سليم: بمعنى اني كنت على علاقة بفريدة ومامتها

عمرو: أنا عارف انكم كنتم أصحاب بس علاقة بمعنى ايه في حاجة تانية ؟

سليم: أنا كنت على علاقة بفريدة وعلاقة عميقة شوية وفي نفس الوقت كنت على علاقة بأفنان بنفس الشكل يمكن أعمق عشان الاختلاف دي بنت ودي مدام

عمرو: ايه اللي انت بتقوله ده انت مجنون ؟

سليم: زى ما بقولك كده وعشان أثبتلك دي صور كنا فيها في مصيف سوا شوف فريدة متصورة معايا ازاي وشوف أفنان حضناني ازاي في الصور

عمرو: ولو كلامك ده صحح ازاي ما كانش في غيره بين البننت وامها ولو كانت فريده مش عارفة ازاي ما كانش في غيره من أفنان ؟

سليم: ماهي النفس ضعيفة يا صاحبي ازاي الأم هتمنع بنتها عن حد بتحبه وفي نفس الوقت الست بترتاح معايا شوف الصور أهو وانت تجمع الكلام, انت لو كنت مش صاحبي عمري ما كنت هقولك الكلام ده ولا هنصحك وأحمد ربنا انك لسه على البر ولو عايز تكمل دوس يا معلم على الآخر بس ما توصلش للجواز هي طول ما البقرة بتاخذ منها لبن ببلاش عمرك تفكر تشتريها ؟

عمرو: أنا مش مصدق هي ازاي رسمت عليا الدور اني فعلاً أول حب في حياتها وكل حاجة كانت بيننا ازاي قدرت اتخدع كده بأني أول حد تعيش معاه كل حاجة في الحياة ازاي

سليم: كلهم بيعرفوا يرسموا نفسهم يا صاحبي لولا اني خايف عليك ما كنتش قولتلك

عمرو: طيب انت تقدر تقول الكلام دة في وشهم وتواجههم ؟

سليم: لا أنا فاعل خير وانت كمان لازم تاخذ حقه اوعى تقولها حاجة انت سيها كده واكسر قلبها انت لو قولتها مش هيفرق بعدها حاجة هي هتنسى بعد وقت وتعيش حياتها وتلاقى ولا مؤاخذه جلنغ تاني

تعيش عليه الدور بس لو مصمم أنا معاك, دَوَّرَهَا فِي دماغك كده
وكَلِّمْنِي قَوْلِي عملت ايه سلام يا صاحبي

وذهب سليم وطال جلوس عمرو في العربية وحيداً يفكر في كل كلمة
قالها له سليم ويرتب الأحداث التي مرت منذ أن عرف فريدة ويتذكر
أول مرة عندما تعرف على فريدة وكانت بصحبة سليم وعندما سألها
أنكرت ومنذ ذلك اليوم لم يحدث أي تجمع بينهم وظل يجمع
الخيوط ببعض حتى اقتنع بكلام سليم وقرر الاتصال بفريدة لينهى
علاقتها بدون أي أسباب حتى يكسر قلبها كما كسرت قلبه مسك
هاتفه وتردد كثيراً أن يسألها أولاً قبل أن ينهى معها كل شيء ولكنه
قال حتى إذا هي نفت كل شيء ماذا ستقول عن الصور؟ فاتصل بها
لتقوم هي من غرفة أفنان لترد عليه بالخارج في غرفتها وتقول: كل
دة تأخير قلقتنى عليك واتصلت كثير ما ردتش عليا كنت فين

عمرو بصوت عنيف: فريدة

فريدة: ايوه يا حبيبي في ايه؟

عمرو: انتي بتحبيني قد ايه؟

فريدة: بعد النهاردة أنا حبي ليك زاد مليون مرة

عمرو: اشمعنى؟ كنتي مش فاكرة اني هاخدك زى ما انتي كدة واقبل
بيكي صح؟

فريدة: انت بتقول ايه! في ايه يا عمرو؟

عمرو: بصى يا بنت الناس كفاية لحد كدة قوى أسف أنا مش هقدر أكمل مع واحدة زيك سلام يا طاهرة!

فريدة: الو الو الو!

أغلق الخط عمرو وهو فى صراع وانهيار تام لا يستطيع القيادة حتى يذهب إلى البيت وفريدة مذهولة مما حدث وتعاود الإتصال به مرارًا وتكرارًا حتى أغلق الهاتف نهائيًا وكانت لا تعلم ماذا حدث لكل ذلك وتبكي فى انهيار.. مؤلم أن ينكسر قلبك وهو فى بداية طريقه للسعادة!

لم تجد شيئًا أمامها غير الاتصال بأحمد وتحكى له ماذا حدث وتبكي بشدة فمهدًاها أحمد ويعدّها أنه عندما تشرق الشمس سوف يذهب إلى عمرو ليعلم ماذا حدث ويطلب منها أن ترتاح قليلًا حتى الغد لكنها ترفض بشدة وتقول له بأنها فى انتظاره وتطلب منه ألا يهملها وتغلق الخط ثم يوقظ أحمد نور حتى تكلم فريدة وتحاول أن تُهدئها حتى طلوع النهار فتتصل نور بفريدة

-الو-

-ترد فريدة بنهية: ايوه يا نور-

-في اية يا حبيبتي ؟

-مش عارفة في ايه هو أنا لو كنت اعرف في ايه كان زمان دة حالي

-طيب ايه حصل احكيلى

-من ساعة ما وصلنى وكنا كويسين جدًا أتصل بيه مش بيرد أتصل بيه مش بيرد لحد لما كلمنى بعدها بساعتين وقالى احنا مش هينفع نكمل مع بعض ولا هينفع اكمل مع واحدة زيك وسلام يا طاهرة ده كل اللى حصل

-طيب يمكن عرف حاجة كده ولا كده

-أنا عمري ما عملت حاجة تخلينى أخاف انى أخسره في يوم من الأيام يا نور ما انتى عارفة

-ما يمكن مخبية عنى أنا كمان راجعى نفسك كده

-أقسملك بالله يا بنتى ما في حاجة كده ولا كده حتى أنا عمري ما عملت حاجة غلط تخلينى أخاف ان حد يعرفها في الدنيا دى كلها

-طيب امال ايه هو الواد ده مجنون

-ما أعرفش يا نور ما أعرفش

-ماهو حاجة من الاتنين يا أما هو مجنون وحس انه اتدبس حب
يخلع يا في طرف تالت في الموضوع عمل الجلاشة ووقع بينكم

-حتى لو كان في حد قاله أى حاجة كذب عليا كان قالى لكن دة كأم
أنا عملت جريمة وهو معاه أدلة انى أنا عملت الجريمة دى وبيتكلم
على أساسها

-طيب اهدى بكره أحمد يروحله ونعرف كل حاجة اهدى بس انتى

-اهدى ازاي يا نور أنا حاسه ان روحى رايحة منى ومش عارفة اعمل
حاجة انتى عارفة عمرو بالنسبالي يعنى ايه

-عارفة يا حبيبتي عارفة بس ياما نصحتك زمان قولتلك انك تعيشى
عادى كده وكل الناس عارفة عنك كل حاجة دة مش صح مش دة
الزمن اللى ينفع تعيشى فيه كتاب مفتوح

-يا شيخة اسكتى بقى ده مش وقته بقولك ايه اقفلى مش نقصاكي
خالص ولا طلباكي سلام

افاقت فريدة وهى منهارة فى البكاء كأنها تعيش لحظة الفراق الأولى الآن
كأن لم يمر عشرون عامًا، عشرون عامًا كأنهم لم يمروا، كأنها تعيش

هذه اللحظة و متذكرة كل تفاصيلها. يا الله برغم اختلاف النساء ..
يبقى سبب دموعهن واحد

"رجل جاء غَيَّرَ لهن الحياة ثم رحل" وعمرو كان سبب تغير حياة
فريدة كلها كان هو سبب تغير مصير الحياة بالنسبة إليها, اكتشفت
أننا كلنا سجناء الذكريات.. نبحث عن مفاتيح النسيان!!

ولم تنسَ قطَّ لحظة من الماضي, محفور في خيالها كأن الماضي كتاب
وهي تقرأه من أول وجديد ولكن بعد عشرون عامًا فتقول لنفسها
لو كان بين يديّ أمنية لَتَمَنَيْتُ : أن أزيل كلمة فراق من حياة
الجميع..!

كانت فريدة امرأة لا تؤمن بالحب , وبعد أن أحبت أصبحت امرأة لا
تؤمن بالرجال !

أشعلت سيجارة وسرحت تسترجع الماضي الأليم مرة أخرى ودموعها
تسيل على وجنتها واحدة تلو الأخرى

نامت فريدة ودموعها سائلة بالكحل على وجنتيها، نامت من كثرة
البكاء وأفافت على صوت امها توقظها وتسألها عن سبب دموعها
وتقول: فريدة في ايه مالك انتي معيطة ولا ايه في ايه؟

فريدة: مفيش حاجة يا ماما

أفنان: لأ في انتي مش شايفة نفسك ولا ايه قومي بصي في المرآة دا انتي
عينيكي وارمه والكحل سايح وحالتك حالة

فريدة: قولت مفيش حاجة

أفنان: اتخانقتي مع عمرو طيب ؟

فريدة: قولت مفيش حاجة الله مفيش حاجة ومفيش عمرو ومفيش
زفت ومفيش حاجة

وبدأت فريدة تبكي من جديد فحضنتها أفنان وهي تقول: طيب بس بس
مش عايزة اعرف حاجة دلوقتي اهدى طيب قومي اغسلي وشك

فريدة: سابني يا ماما وأنا ما عملتش حاجة سابني وقالى أنا مش هينفع
أكمل مع واحدة زيك وقفل ومش عارفة ليه

أفنان: اهدى طيب وأنا هكلمه اهدى بس

فريدة: اتصلى بأحمد شوفيه عمل ايه صحّيه خليه يروحله يفهم في ايه

أفنان: طيب حاضر

قامت أفنان لتتصل بأحمد وتحاول أن تفهم منه ماذا حدث

-الو

-اية يا فوفا عاملة ايه؟

-مش وقته قولى فى ايه ؟

-أنا نفسى مش فاهم فى ايه لقيت فريدة بتكلمنى امبارح وبتقولى ان عمرو كلمها وقالها انهم لازم يسيبوا بعض من غير أى سبب

-طيب معلش يا حبيبى قوم روحله شوف ايه اللى حصل فريدة منهارة ومش فاهمة حاجة

-طيب أنا هروحله وهكلمك بعدها

-كلمنى أنا الأول ما تكلمش فريدة

-حاضر

أحمد أغلق الخط ليجهز ويذهب إلى عمرو ليفهم ماذا حدث وعندما وصل أحمد إلى بيت عمرو لم يجده وقال له والده أنه قال أنه سيبيت عند أحد أصدقائه للاحتفال به, اتصل أحمد بأفنان وقال

لها ماذا حدث أغلقت الخط معه وقالت لفريدة لا فائدة من بكائها
ويجب ان تصمد حتى تعلم أسباب تغير عمرو وأن البكاء ليس حلاً،
قاطع حديثها جرس الباب وكانت الطارقة نهى جاءت لفريدة بعد أن
عرفت بالأمر بأكلمه من نور ودخلت مسرعة لتحتضن فريدة وتقول:
مش عايزة اللى حصل بأثر عليكى بكرة كل حاجة هتتحل انتى أقوى
من كدة ما ينفعش اشوفك بتعيطى كده أنا عمرى ما شوفتك فى
الحالة دى، فىن كلامك عن إن أى حاجة بتحصل فى الدنيا لهما
حكمة محدش يعرفها غير ربنا

فريدة: أنا حاسة ان روى رايحة منى انتى عارفة يا نهى أنا لو اعرف
اللى خلاه يتغير كده كنت ارتحت لكن دة ما قالش أى حاجة غير انى
مش الإنسانة اللى ينفع يكمل معاها قالى أنا مش هينفع اكمل مع
واحدة زيك

نهى: طيب اهدى

فريدة: أنا لا عارفة اهدى ولا افكر ولا اعمل أى حاجة

نهى: طيب حاولى تنامى فى حضنى شوية ولا أقولك تيجى ناكل

فريدة: أنام فى حضنك أرحم

نهى: طيب خليكى فى حضنى مش بزمتك حضنى أحلى من حضن عمرو

فريدة: عايضة تفضلى موجودة متجيبيش سيرة عمرو غير لما يفهمكم هو
ليه عمل كده أو يظهر ماشى

نهى: طيب ماشى, بقولك ايه احكيك حدوتة

فريدة: ممكن

نهى: كان يا ما كان كان فى زمان بنت اسمها سندريلا البت دى كان طالع
عين أبوها مع مرات أبوها

قاطعتها فريدة قائلة: ملعون ابو دى حكاية يا شيخة اخرسى أحسن

نهى قائلة بضحك شديد: طيب مش عايضة تعرفى ايه اللى حصل
لسندريلا دى هى اللى أثبتت ان جوز جزم يغير حياة أى بنت تيجى
ننزل نشترى

فريدة: بعد طالع عين أبوها وجوز جزم دى روحى يا نهى احسن

نهى: طيب خلاص احكيك الشاطر حسن ؟

فريدة: بقولك ايه اخرجى من دماغى احسن والله اطلعه على جنتك

نهى: طيب ولّعيلنا سيجارتين بدل الخرمّان اللى احنا فيه ده

فريدة: قومى شيشى مع ماما أحسن السجاير مضرة للى فى سنك

نہی: انتی بخیلے بس ماشی أنا أصلاً جاییة سجایر معایا إیاک یتمر

فريدة: طب ولعی انتی وشغلی ای حاجة تشغلنا

قامت بتشغیل نہی أغنیة حسن الأسمر کتاب حیاتی یا عین فضحکت
فريدة بشدة وقالت: هی دی حکایة الشاطر حسن ؟

نہی: ایوه بالظبط

فريدة: منک لله یا شیخة

استطاعت نہی أن تلمی فريدة عن التفكير والبكاء وعلى الجانب الآخر
عمرو نائم بالعربة لا یدری شیئاً عن العالم المحيط به وبعد أن أفاق
وجد هاتفه لا یوجد به شحن فذهب إلى البيت و شحن هاتفه
وعندما فتح وجد مئات الاتصالات من فريدة وأحمد وأفنان وهو
ینظر فی الرسائل كان أحمد قد وصله رسالة بأن هاتف عمرو قد
فُتِحَ فقام بالاتصال به فرد عمرو:

-الو-

-ایه یا عم انت فین من امبارح قالین علیک الدنيا

-فی ایه یا أحمد

-انت فین عایز أشوفک

-لسه مروح

-طيب جايلك

-لا يا أحمد لو جاى تتكلم فى موضوع فريده ما تجيش

-لا لازم اشوفك وافهم فى ايه

-باختصار مفيد خلاص كل اللى بينا انتهى

-ما أنا لازم افهم ايه حصل منها خلاك تقول كده

-مش عايز اتكلم دلوقتى

-لا هنتكلم مش لعب عيال هو أنا جايلك وإياك تتحرك من مكانك

-ماشى سلام

كانت أفنان على الانتظار فرد عليها عمرو بعد أن أنهى كلامه مع أحمد

وقال:

-نعم

-ايه الأسلوب ده يا عمرو فى ايه ؟

-انتي أدرى يا ختي

-يا ختي؟

-انت ازاي تكلمني كده يا ولد

-ولد ايه انتي خليتي فيها ولد انتي وبنتك

-انت اكيد أعصابك تعبانة

-بعد اللي أنا شففته وعرفته لازم تكون أعصابي تعبانة يا طنط من الآخر كده انتي وبنتك معرفتكم ما تلزمنيش والحمدلله ان ربنا نورلي بصيرتي واحنا على البر قبل ما تلبسوني بنتكم العفيفة الشريفة وهي البننت هتطلع لمن يعنى سلام

كانت أفنان مذهولة مما حدث ولا تدري هل تحكى ما حدث لفريدة أم لا لكنها خافت عليها من الصدمة بأسلوب عمرو فنادت على نهي لتخبرها ما حدث وكان رد نهي: أكيد في حد فبرك حاجة وقالها له مش ممكن يكون ده عمرو اللي عرفناه ولا اللي حب فريدة في حاجة غلط كبيرة مش مفهومة

أفنان: حتى لو ده حقيقي كان بيعي يسأل ويتأكد مش يتصرف كده ده ما يستاهلش بنتي وأنا عمري ما هوافق انه يرجعها حتى لو روحها فيه اللي ما يحترمش أمها حتى لو كانت حقيقي مش محترمة هيعمل

ايه فيها دا لو اتخانقوا بعد ما يتقفل عليهم باب واحد تقدرى
تقوليلى ؟

نهى: والله عندك حق بس أكيد فى سوء تفاهم وأكيد لما يفهم الصح
هيبجى يعتذرلك ويبوس ايدك وراسك ويراضى فريدة ربنا يهديه
ويفهمنا ايه اللى بيحصل

أفنان: خليكى انتى مع فريدة دلوقتى وما تقوليلهاش أى حاجة من اللى
حصلت وأنا هكلم أحمد اشوفه عمل ايه

نهى: طيب

ذهبت نهى إلى فريدة بالغرفة المجاورة وتتصل أفنان بأحمد وتسرد له
ما حدث بينها وبين عمرو ليقول لها أحمد انه فى الطريق إليه
وعندما ينتهى من هذا اللقاء سوف يتصل بها ليحكي لها ماذا دار،
وبعد دقائق كان أحمد قد وصل بالفعل إلى عمرو وجلس معه
بغرفته وسأله عن الذى حدث وطلب منه أن يحكى له ماذا حدث
وبالفعل حكى عمرو لأحمد عن سليم وماذا قال له وقال: وادى
الصور كمان بين سليم وأفنان وفريدة بتأكد كلامى اللى قاله سليم

أحمد: بزمتهك مش مكسوف من نفسك

عمرو: بعد كل اللى قولته ده انت مش مقتنع

أحمد: بقولك ايه أنا أعرف فريدة من واحنا عيال بنرضع سوا وانت تعرف فريدة بقالك سنة وكام شهر تقدر تقولى ما تصورتش انت وأفنان وفريدة صور زى دى باختلاف ان دى صور فى مصيف وانت متصور معاهم فى مكان عادى, بلاش , ما فكرتش تفتح عندى الفيس بوك وتشوف صورى أنا وفريدة وأفنان اللى تقريبًا فى كل الصور أنا حاضن الاتنين. بكده أنا على علاقة بالاتنين صح ؟ هو اللى بتصور مع واحدة ويحط ايده فى وسطها كده هو نام معاهها مثلاً وبعدن انت عارف كويس قوى ان فريدة و أفنان أصلًا متفتحين جدًا ودماغهم غريبة يعنى مش ده مقياس للكلام اللى انت بتقوله

عمرو: وسليم هيكذب ليه ؟

أحمد: السؤال ده انت تسأله لنفسك أنا بقولك أهو سليم عمره ما كان على علاقة بفريدة وأفنان أشرف كثير من انها تعمل علاقة مع عيل من دور بنتها

عمرو: طيب وتسمى بأيه ان واحدة زى أفنان عايشة أكثر من خمس سنين من غير راجل بعد ما كانت جربت يعنى ايه جواز وانت فاهمنى

أحمد: بعيدًا عن انك بتتكلم عن أفنان اللى هى زى أمى أنا شخصيًا بس أنا هرد عليك عشان انت جاهل وصدمتنى فيك, لو كانت أفنان محتاجة راجل زى ما انت بتقول كانت اتجوزت بعد ابو فريدة ولو كانت خايفة على بنتها ان راجل غريب يدخل عليها وهى عروسة كده

كانت اتجاوزت في السرزى حال ستات كثير في نفس موقفها بس
العلاقة بين أفنان وفريده تسمع ان أفنان تقولها انها محتاجة
تتجاوز لأسباب جنسية مش هتتكسف يعنى بس أفنان مش محتاجة
ده لأنها كارهة ده أصلاً وحقيقى يا عمرو انت حتى لو اتأكدت ان
الكلام ده غير حقيقى أنا مش هسمحك ترجع لفريده أبداً رغم ان
أنا شخصياً ممكن اكون معترض على حاجات كثير في حياة فريده
بس دلوقتى بس اتأكدت انها صح وأنا بقولك أهو انت هتحفى
عشان ترجعلها ولورجعتك تبقي غلطانة سلام

وخرج أحمد وهو مستاء جداً من عمرو ومن تفكيره بهذا الشكل ومن
التشكيك بأخلاق فريده وأفنان بعد أن عاشهم وكان لا يدري كيف
يقول لفريده أن عمرو يشكك بأخلاقها فاتصل بأفنان وقال لها أنه
قادم هو ونور إلى البيت لأنه يريد أن يتكلم مع فريده واتصل بنور
وقال لها بأنه سيمر عليها ليذهبوا لفريده ولم تمنع وبعد أن وصلوا
إلى منزل فريده فتحت لهم نى الباب وكانت فريده وأفنان في غرفة
استقبال الضيوف فى انتظارهم فتقول فريده: ها ايه حصل قالك
هو عمل كده ليه قالك طيب أنا عملت ايه يا أحمد ساكت ليه فى
ايه

أحمد: أنا هحكى كل حاجة وبدون مقاطعة نهائى واسمع ردك بعد ما
أخلص خالص ماشى ؟

وبعد ان حكى لهم أحمد كل شىء فريدة دخلت في حالة انهيار عصبى حاد وطلبوا لها الدكتور فى المنزل وبعد أن أعطى لها الدكتور حقنة مهدئة ونامت كانت نهى قد قررت أن تجمع بين سليم وعمرو فى مكان واحد بدون علم بعضهما حتى تثبت لعمرو أنه كاذب حتى إن لم ترجع له فريدة مرة أخرى محاولات الصلح الذى سوف يفعلها سترجع فريدة إلى حالتها الطبيعية و وافقها الجميع على ذلك وكان دور أحمد أنه يتصل بسليم كالعادة ليطمئن عليه ويحدد موعداً للخروج ثم يتصل بعمرو ويقول له أنه يريد فى أمر هام ويحدد معه نفس المكان والزمان وقد حصل بالفعل وتجمع عمرو وسليم بمكان واحد مع نهى وأحمد ونور

نهى: ازيك يا سليم عامل ايه ؟

سليم: خشى فى الموضوع يا نهى انتوا عاملين قاعدة ليا أنا و عمرو ليه
وفين فريدة هانم

نهى: لا قاعدة ولا حاجة هى فعلاً ناقصة فريدة بس بسببك هى فى انهيار
عصبى حاد وبتنام بمهدئات

سليم: يا حول الله يارب يا حرام كل ده عشان قلت لحبيب القلب
الحقيقة

نهى: انت شايف نفسك راجل ؟

سليم: راجل وسيد الرجاله

نهى: طيب كلمنى عن رجولتك

وانت قاعد وسط اصحابك و لما تعجبك بنت

تقوله بص يااض

وتخلى كل اللى قاعدين كلهم يبصوا عليها !!

كلمنى عن رجولتك

وانت مدى الحق لنفسك

تتريق على بنات الناس سواء كانت حلوة أو وحشة

على الرغم من انك أصلاً لا شكل ولا منظر

ولا حتى شخصية أى حد ممكن يحترمها

كلمنى عن رجولتك

الى تديك الحق تتكلم فى أعراض البنات وتفضحهم

مش من حقك على فكرة

سواء كانت مؤدبة أو مش مؤدبة !!

كلمنى بقى أكثر عن رجولتك

لما تطلع على بنت سمعة

لمجرد انها رفضت تكلمك و كسفتك و صدتك

مصداق نفسك حاسس انك راجل لما بتعمل كده !!

خليك راجل

وأياك تنسى " كما تدين تدان "

سليم: انتى بتتكلمى على ايه ؟

نهى: هو انت مش عارف ان يوم عيد ميلاد أحمد السنة اللى فاتت يوم ما صارحت فريدة فى الموبايل انك بتحبها وهى صدتك انها حكلى كل حاجة هو انت فاكر ان محدش يعرف غيرك انت وهى هو انت فاكر ان يوم قراية فاتحتها على عمرو انت تعبت بسبب انك اكتشفت ان فتاة أحلامك بتضع منك وقررت تخلى عمرو يسبب فريدة عشان يخلالك الجوو بس انت طلعت غبى عشان اللى انت ما تعرفوش ان اه فريدة ما بقتش لعمرو بس مش هتبقى ليك وهتبقى لأى حد تانى

غيرك برضه يا ترى بقى فاكر انك هتفضل فى حياتها لما تعرف حد تانى وترتبط بيه عشان توقع بينها وبينه.

وانت يا سى عمرو دايمًا البننت اللى من تحت لتحت هيا اللى بتكسب فى كل حاجة .. مع انها جريت كل حاجه وداست فى كل حاجة . بس دايمًا بتعمل نفسها مش فاهمة حاجة .. وفى الآخر هى اللى بتتحب وتتجوز وكل حاجة تمشى فل فى حياتها .. أما البننت اللى عايشاها عادى واللى فى قلبها على لسانها واللى بتتعامل عادى مع أى ولد دايمًا تبقى شمال وما تنفعش يا معلم أصلها بنت لفت ودارت وشافت ...

برافووووو البس العمة يا راجل ياللى عايز البننت تكون سهنّه ومسهوكة ومش فاهمه فى حاجة البس ... ولما تيجى تلبس اللبسه التمام ما تجيش تدور عالبننت اللى كانت جدعة وفكرتها شمال ..

إياك ترجع تدور على فريدة عشان محدش فينا هيسمحك انك تقرب منها تانى واديني جيبتمكم قدام بعض عشان تعرف ان سليم ده ولا حاجة وعايز تفضل مصدق براحتك بس هيبقى يوم تعرف فيه الحقيقة وترجع تبوس الأيادى

سليم: ما تصدقش أى حاجة من اللى هى قالتها يا عمرو أنا ما بكذبش عليك ولا عمري حبيت فريدة

عمرو: كفاية كذب بقى ليه يا أخى عملت كده ليه حرام عليك

سليم: عشان هى ليا أنا مش ليك انت ما ينفعش تكون لحد غير ليا

عمرو: وزى ما هى قالت عمرها ما هتكون ليك وانت خليتها مش ليا

نهى: انتوا الاتنين أقدر من بعض انت عشان شوّهت سمعتها يا سليم
وانت عشان صدقت أى كلام وهرى ورميت ودنك وانت عارف
ومتأكد ان الإنسانة اللى معاك دى أحسن واحدة فينا تقريبًا على
الأقل هى واضحة مع نفسها قبل ما تبقى واضحة مع الناس يا سى
عمرو, مش يلا ولا ايه !

وذهبت نهى ونور وأحمد وتركوا سليم وعمرو نتشاجران بسبب ما
حدث وقرروا الرجوع إلى فريدة للاطمئنان عليها أما عمرو فشعر
بالندم الشديد وأن غبائه كان السبب في تضييع فريدة وجلس يفكر
كيف من الممكن أن يحاول أن يسترد ثقتها به مرة أخرى, حاول
الإتصال بها كثيرًا لكن لا حياة لمن تنادى.

أما فريدة فكانت تتألم بشدة كان من الصعب بعد أن كان لها أسرة
كاملة مكونة من أب واخ وأبن وصديق وحبیب أن يختفوا من حياتها
فجأة أن تصدم بهم جميعًا معًا ولكن بعد عدة شهور حاولت أن
تلملم نفسها وتضع كل تركيزها في الدراسة حتى تتفوق وتنتهى من

عذاب الدراسة لتخطط لمستقبلها وقررت أن حياتها لن يكون بها
مكان لرجل اخر

وفجأة رقم غريب مجهول الهوية يتصل بفريدة فتزد: الو

عمرو: الو.. فريدة أنا لازم اتكلم معاكى لأخر مرة وما تغيريش رقمك أنا
مش هضايقتك تانى لو انتى عابزه ده بس أقسم بالله أنا ما حبتش
حد زيك فريدة أنا كان نفسى اسمع صوتك لأخر مرة مش أكثر وأنا
اسف لو ضايقتك فى يوم من الأيام ولو ما اتكلمناش تانى خلى بالك
من نفسك ولو هتختارى حد تانى أمانة قوليله فى انسان طلب منك
طلب انك تخلى بالك عليا أنا كان لازم اقولك الكلام ده عشان أنا
بقالى شهر بحاول أوصل ليكى مش عارف انتى مش مخلية أى
طريقة ولا أى باب ممكن أوصلك عشان اكلمك منه ما كانش فى
قدامى غير الطريقة دى و والله أنا مش هضايقتك تانى انتى أجمل
حاجة حصلتلى فى حياتى وأنا بغبائى ضيعتك

فريدة: خلصت .. مع السلامة

وأغلقت فريدة فى وجة عمرو الخط وقلبيها يخفق بشدة والدموع سائلة
على وجنتيها فكانت فريدة على الرغم من شدة احتياجها لعمرو لا
تستطيع أن تسامحه ابداً لأنها لم تصبح ملاك بعد ان كسرهما
أصبحت بشر، تلك الفترة كانت فريدة مشغولة بمشاكل نور وأحمد
لأن أحمد اكتشف أشياء كثيرة عن نور ولم يخبرها هو يخبر فريدة

ونهى وهما الاثنان ينيهان نور لأفعالها لكنها لا تكثرث لأنها تظن انهم يقولون ذلك لتغيير سلوكها وإجبارها بأن تعترف لأحمد بأشياء كثيرة كالتدخين والخروج بدون علمه واصدقائها الشباب الذى لا يعلم هو عنهم شيئاً ولكن عدم اهتمامها أوقعها فى مشاكل عدة، فقررت فريدة أن تشغل نفسها مع أصدقائها حتى لا تفكر فى عمرو كثيراً.

كانت نور تجلس مع زملائها فى الجامعة فى مكان عام وأغلبهم شباب و وجدت أحمد أمامها ليسألها عن السيارة التى بيدها ويقول: ايه ده ما شاء الله بقينا بنحب دخان السجاير وماسكينها وبنشرب

نور: أنا لسه بجرب وكنت..

قطع كلامها وهو يقول: هو انتى مش المفروض فى الكورس دلوقتى ؟ لا هو كورس جميل الصراحة

ليسأل زميل لها ويقول: مين ده يا نور

أحمد: مين الأخ

الشاب: أنا صاحبها انت مين؟

أحمد: المفروض انى حبيبها او فى اعتبار خطيبها انت بقى صاحبها من اى نوع ؟

الشاب: انتى مرتبطة ؟

نور: فى سوء تفاهم بلا بينا يا أحمد

الشاب: انتى مرتبطة بيه ؟

نور: يلا بينا يا أحمد لو سمحت

أحمد: مش قبل ما تردى على .. صاحبك

نور: طب أنا همشى

أحمد والشاب فى نفس اللحظة: مفيش مرواح فى حتة قبل ما تفهمينا

ايه اللى بيحصل ده !

نور: ما اهو أصل..

قاطعها أحمد مرة اخرى : لا أصل ولا فصل من النهاردة انتى بالنسبة

لى واحدة من الشارع يمكن أقل كمان

وتركها وذهب وهو مذهول من كل شىء فاتصل بفريدة وقال: الو انتى

فين

فريدة: بلبس ونازله انت فى فين ؟

أحمد: وراكى حاجة يعنى ؟

فريدة: لا زهقانة ونازلة أتمشى

أحمد: طيب أنا محتاجك تعالى نتقابل في مكاننا

فريدة: مسافة السكة

وبعد دقائق معدودة وصل كل منهما وجلسا سوياً وحكى أحمد لفريدة عن الذى حدث وكانت فريدة لا تجد أى رد تقوله له غير: بص يا أحمد في حاجات كثير مش بإيدنا نغيرها بس انت أصلاً أسلوبك في الحياة غلط و هي كمان تفكيركم رجعى جداً وبتعملوا حساب لحاجات مش موجودة أصلاً ولا هي مهمة في الارتباط لأن اللى يرتبط بجد ده الأهم من انه يكون بيحبه انه يكون واثق فيه لأن الحب لو راح بعد كده بيبقى في ثقة و ارتباط وعشرة وحاجات تانية كثير تخليكم سوا لكن لو الثقة راحت ما ينفعش أبداً تكملوا المشوار

أحمد: على قد ما أنا في الحقيقة طول عمرى بختلف معاكى كثير أكثر فترة أنا متأكد فيها انك صح في كل حاجة في الدنيا احنا دلوقتى زى بعض انتى عندك عدم ثقة في عمرو وأنا في نور

فريدة: لا أنا مبقاش عندى ثقة في أى حد حواليا مش عمرو بس يمكن عمرو كان هو كل اللى حواليا من يوم ما عرفته عشان كده ده السبب ما أعرفش بس كل اللى أنا بقوله حسبى الله ونعم الوكيل في كل واحد ظلمنا ، في كل واحد باعنا وجه علينا ، في كل واحد قال

علينا كلمة مش فينا وسايبه الدنيا تدور وكل واحد هياخذ رزقة
ونصيبة

أحمد: على رأيك بس أنا ما كنتش اعرف انك قوية كده

فريدة: لأ قوية ولا حاجة كل الحكاية انى ما بحبش أضعف قدام حد
بس بينى وبين نفسى انسى بقى

أحمد: عارف والله عارف وبقيت حاسس

فريدة: انت تعرف انه بيحاول يكلمنى كثير, أنا عارفه انه ندمان على
اللى عمله بس هو على قد ندمه على قد ما أنا موجوعة منه يا أحمد

أحمد: فريدة لو بتحبيه قوى كده سيبيه شوية يندم وبعدين ارجعيله
حرام الحب ده كله يروح عشان واحد زى سليم

فريدة: هو انت فاكر ان مشكلتى فى سليم ؟ أنا مشكلتى فى عمرو نفسه
سيبك من انى فقدت الثقة فيه تعالى نقول لو أنا و عمرو اتجوزنا
دلوقتى بقى وأنا بشتغل الصبح وبقى اليوم فى البيت وجه حد قاله
ان أنا مش بروح الشغل الصبح وبعمل أى حاجة تانى انت عارف ان
عمرو ممكن يراقبنى و الجوده ؟

أحمد: بس دة حب زايد

فريدة: لا ده شك وفي فرق كبير بين الشك والغيرة والحب الزايد وكده
صعب قوى انى احس بالأمان تانى مع عمرو بعد ما هو عرّانى انت
عارف حتى لو كان كلام سليم صح لو أنا كنت مكان عمرو كنت
هكذب سليم واشتمه وامشى وبعدين اتصرف معايا حتى لو هنسيب
بعض لكن ده خلى سليم يصدق كدبته انت عارف يعنى ايه واحد
بيجى يقولك مراتك مثلاً كانت معايا فى الوقت الفلانى وانت تقوله
دى كذا وكذا وكذا من غير ما تحط صوابك فى عينيه ؟

أحمد: عارف يا فريدة بس انتى عمرك ما كنتى هتلاقى حد يقبلك كده
من غير ما هو يكون فيه عيوب هو كمان

فريدة: بس فى عيوب بتقدر تعيش معاها وفى عيوب لأ لو انت شايف
كده يبقى على قد حبك لنور ممكن تسامحها وتقدر تعيش مع عيوبها

أحمد: لأ طبعاً

فريدة: شفت بقى

أحمد: ربنا كبير قادر يخلينا ننسى ونعيش حياتها

فريدة طيب أنا همشى بقى عشان ماما ما تقلقش عليا كويس أصلاً
انها سابتنى انزل

أحمد: استنى نمشى سوا وأوصلك بالمرة

فريدة: طيب

وفي طريقهما للخروج وجدت فريدة عمرو أمامها فتوقفت لثانية ثم
مرت كأنها لا تراه حتى قال: فريدة!

فريدة: ابوه

عمرو: ممكن اسألك سؤال ؟

فريدة: اتفضل

عمرو: فريدة انتى كويسة ؟

فريدة: الحمدلله

عمرو: متأكدة ؟

فريدة: قولنا الحمدلله

في حاجة ؟

عمرو: مفيش ممكن بس تبقى تطمينى عليكى ؟

فريدة: بمعنى ؟

عمرو: أنا والله عارف انك مش عايزة تتكلمى معايا بس مش عايز أطول
عليكى وعايز أبقى أتطمئن عليكى

فريدة: لأ أبدًا أنا مستغرباك مش أكثر .. ليك عين ؟

عمرو: لا أسف عن اذنك المهم انى اتطمنت عليكى وانك كويسة

فريدة: ادعيلى بس يارب دايمًا أكون كويسة

عمرو:والله بدعيلك دايمًا بكل خير

فريدة: ياريت تدعيلى كمان ان ربنا يبعد عنى ولاد الحرام

عمرو: ان شاء الله عن اذنك

أحمد: هو أنا كنت هوا ولا شفاف ؟

فريدة: فى الحالة اللى هو بقى فيها دى مش هيشوف أى حد غيرى
عديها

أحمد: بس سيبك عجبتنى قوى الصراحة

فريدة: أنا كنت متوترة جدًا

أحمد: ولا بان عليكى أى حاجة انتى واحدة عايشة حياتك ولا فى بالك
ولا كأنه كان فى حياتك

فريدة: بقولك ايه افكرت حاجة هجيها هنا من على البحر وبعدين
هروّح إمشى انت

أحمد: كان سهل انك تقولى عايزة أبقى لوحدى شوية

فريدة: بالظبط كده يلا طرّقنا

أحمد: طيب طمني ي لما ترؤجى

فريدة: ماشى حاضر

أحمد: فريدة ربنا ما يحرمنى منك

فريدة : ولا منك

وكانت تعلم فريدة بأن السماء تتألم من أجلمها ولن تتركها ودموعها
سائلة هكذا أمام العالم والناس كان ولا بد أن تبكى السماء معها
حتى تمشى تحت المطر ولا أحد يراها يعلم أنها تبكى وبالفعل حدث
ذلك لكن لأول مرة كانت فريدة " تبكى و ترقص "

بعد أن وصلت فريدة المنزل كان عمرو يتصل بإلحاح فقررت أن ترد
عليه لتفهم ماذا يريد

- الوازيك ؟
- تمام ..
- هو سؤال بس
- اتفضل
- اتضايقتي لما شفتيني ؟
- لا عادى
- متأكدة ؟
- كان طبيعى انى اشوفك
- اشمعنى ؟
- عشان المكان ده احنا الاتنين بنجبه واحنا الاتنين مش هنبطل
نروحه كان وارد - اشوفك عادى يعنى
- طيب كنت عايز اكلم ماما
- بخصوص ؟

- في حاجات كثير هي فهمها غلط أنا مش عايز منكم حاجة بس انتوا
أغلى اتنين في - حياتي في ناس كثير وقَّعت ما بيننا وأنا طلعت غلطان
ولازم اعترف بغلطي واعتذر

- لأ شكراً مفيش حاجة لو كان في حاجة ما كنتش سلمت عليك ما
تشغلش بالك بالكلام ده يا عمرو

- أكثر حاجة تأكدلى ان في حاجة انك بتتكلّمى رسمى قوى وبتقوليلى يا
عمرو مش يا عمورى

- أنا بتكلم عادى اتعلمت ما أدّيش حد أكبر من حجمه

- طيب أنا أسف مش عايز اكون معطلك

- لا مفيش حاجة

- كفاية انى اتطمنت عليكى وشفتك كمان

- شكراً سلام

- سلام

أغلق عمرو الخط وهو في حالة شعورية متضاربة لا يعلم هل يكون
سعيداً لأنه رآها وسمع صوتها أم يكون حزيناً من صديّها له فقرّر
أنه لا ييأس حتى تستعيد فريده ثقّتها به

وعلى الجانب الآخر كانت فريدة تتألم بسبب أنها صُدِمت في عمرو كانت تمنى أن يكون هذا مجرد حلم وسوف تستيقظ بعد فترة, كانت تريد أن تحتضنه وتبكي على صدره كانت تريد أن تشتكى منه إليه, لأنه ليس حبيبها فقط هو أيضًا أبها وأخها وصديقها المقرب وكل شيء من الصعب جدًا أن تفقد كل هؤلاء الرجال معًا لكنه لم يكن بيدها أن يكون كل الرجال مجتمعين في شخصٍ واحد وعلى الرغم من شدة ألمها منه قررت أنها تغلق صفحة عمرو للأبد ولا تفكر به أبدًا حتى تنتهي من دراستها وتسافر بعيدًا عن الواقع نهائيًا كانت تعلم أنها لن تستطيع أن تفعل ذلك لكن عاهدت نفسها أن تحاول فتحاول أن تستبعد عمرو من تفكيرها فقررت فتح التليفزيون لمشاهدة أى شيء فكأن القدر يرسل إليها أغنية لتواسمها لتكون أغنية Je t'aime لمطربتها المفضلة لارا فابيان فتغنى معها بصوت عالٍ وتبكي بشدة

ومرت شهور ولا جديد في حياة فريدة, عمرو يحاول الوصول لها وهي قد أغلقت هذا الباب تمامًا ونور وأحمد انفصلا انفصلاً تامًا ونهى ما زالت تحارب مع أهلها حتى يتفهموا وضع أنها تملك من العمر عشرون عامًا وهي ليست طفلة صغيرة ولها مطلق الحرية في تحديد ملامح مستقبلها لكن فريدة على الرغم من أنها أغلقت صفحة عمرو نهائيًا كانت تسأل نفسها دائمًا .. لماذا جاء بك القدر لحياتي

طالما هو لن يمنحني فرصة الحياة معك؟ , كانت فريدة دائماً تكلم عمرو في نفسها تريد تفسر أشياء كثيرة هي غير قادرة على تفسيرها تسأل نفسها هل عمرو كان محطة لبوابة أكبر, هل سوف تحب من بعده؟ كانت فريدة دائماً تسرح في كل الذكريات التي مرت مع عمرو وتنتهي التفكير به وتقول له في نفسها لا تقلق لن أكرهك!! ولن أتحاشى الحديث عنك في مجالسهم..ولن أغير الطريق إذا ما جمعتي يوماً بك.. ولن أتهرب من بقاياك .. لن أهبك هذه الأهمية أبداً. وترجع لتقول له أشتاقك كثيراً كانت فريدة قد جُنَّت بعلاقتها بعمرو ولأنها شرقية كانت تتألم وتقول لا أكثر!

أما نور فقد ضلَّت الطريق الصحيح وكانت تقول يا ليتني كنت مثلك يا فريدة تعرفين ماذا تريدان على الرغم من أنها كانت تهاجمها دائماً.

أما عن عمرو فقد أدرك كيفية خروج الروح دون الموت من بعد خروج فريدة من حياته ظل تعيساً وفاشلاً وإنساناً بدون طموح

وأحمد أدرك أن الناس معادن وأن الفتاة ليس بمظهرها الخارجي فقط بعد تجربته مع نور وأن فريدة هي مثال البنت المخلصة على الرغم من كل عيوبها الذي يكرهها فيها وقرر أن يبحث عن بنت يرتبط بها مثل فريدة وخصوصاً أن أحمد يكبر فريدة بعام وهو قد أنهى هذه السنة دراسته واسلتم وظيفة في شركة محاسبة

وعن نهى فهى قررت أن تواجه أهلها بكل ما تفعله دون علمهم وأن تحدد ملامح مستقبلها بعيداً عن آراءهم لكن تنتظر مرور آخر سنة دراسية لها وتتم الواحد والعشرون من عمرها ثم تواجه الواقع

أما عن فريدة فقررت أن تنتهى من آخر عام لها بالجامعة وتسافر لتبدأ من جديد بعيداً عن كل الذكريات الموجعة ولتترك لأفنان الفرصة أن تبدأ حياتها هى الأخرى مع شريك حياة يعوضها عن عمرها الذى أفنته على فريدة حتى تصبح ناضجة

وفى خلال ذلك العام أكثر من شاب حاول أن يتقرب من فريدة لكنها كانت تغلق الباب فى وجه أى شاب يحاول فقط التلميح لها بالإعجاب عدا خالد بهرها من الخارج فقط وعندما اقتربت منه وجدت أنه مثل أى شاب آخر يحاول أن يقضى وقت فقط فقررت فريدة أن تنتقم منه ليكون عبرة لأى شاب يحاول تسلية وقته فقط والهروب للبحث عن غيرها كان هدفها الوحيد أن يقع خالد فى حبه وعندما يحبها خالد ستقول له اسفة لست أنت الشاب الذى من الممكن أن أكمل حياتى معه وتنسحب من حياته ليذوق معنى المعاناة حتى لا يلعب بمشاعر أى بنت أخرى وبالفعل فعلت فريدة كل شئ فى الوجود حتى يقع خالد فى حبه فقرر خالد أن يصارح فريدة لأول مرة بمشاعره حتى تفرح وتطمئن أنه تغير وأنه سوف

يأخذ الموضوع على محمل الجد وأنها هي السبب في كل شيء تغير في حياته فطلب رؤيتها وعندما تقابلا قال لها: فريدة أنا عايز أقولك حاجة مهمة

فريدة: خيرا خالد

خالد: بصى أنا أول ما عرفتك ما أنكرش انى كنت بضيع وقت مش أكثر بس انتى كنتى عجبانى جدًا وأنا قولتلك ان صعب انى أحب وانتى وشطارتك وانى ما أكرهش انى أحبك لو قدرتى تخلىنى أحبك

فريدة: حصل وبعدين ؟

خالد: انتى فعلا كنتى شاطرة قوى وخليتىنى أحبك وأنا طالب انى أقابلك النهاردة عشان عايزك تحددى ميعاد مع اهلك عشان أخطبك

فريدة: ومين قالك انى هوافق ؟

خالد: وليه ما توافقيش ؟

فريدة: عشان أنا مش بتاعة جواز والكلام ده بكرة ربنا يوعدك بالبنت اللى تستاهلك لكن أنا واحدة معقدة ملهاش فى الكلام ده

خالد: ومين قالك انى كنت بفكر غير كده غير لما عرفتك انتى غيرتىنى

فريدة: وانت كمان غيرتى خليتى أقوى ومفيش مشاعر تهزنى

خالد: يعنى ايه ؟

فريدة: يعنى روح شوف حياتك وأنا اشوف حياتى أنا كلها أقل من سنة
واخلص كلية وبعدين ابدأ مشوار الألف ميل فى مستقبلى واسافر
واشوف حياتى وانت عارف من الأول ان طموحى السفر مش الجواز
والكلام الفارغ ده

خالد: أنا قولت زى ما أنا اتغيرت عشان حبيتك انتى كمان هتتغيرى
عشان الحب ده طيب تسمى مشاعرك ناحيتى ايه ؟

فريدة: تضيع وقت كنت بشغل فراغى وأنا ما وعدتكش بأى حاجة

كانت فريدة فى هذة اللحظة تدمر حياة خالد كما هى مدمرة كانت
تعلمه درسًا لن ينساه فى حياته كانت تظن أنها بذلك تعلمه أن لا
يلعب بمشاعر الآخرين لكن هى كانت تعلمه أن لا يحب أبدًا لم تحس
بالذنب وقتها مضت وكأن شيئًا لم يحدث لكنها أشبعت بداخلها
رغبة الانتقام ولكن كانت تنتقم من من ؟ من نفسها أم من خالد أم
من عمرو أم من الدنيا بأكملها ؟

وتعلم خالد الدرس ولكن بشكل عكسى, تعلم أن لا يؤمن بالحب أبدًا
ولكن فى الوقت ذاته لا يكسر أحد ولا يجرح مشاعر أحد كانت فريدة
هى من علمته الإحساس بالغير وهى من كسرتة و تسببت فى آلام
كثيرة له كان يظنها ملاك ولكنه لا يعلم أنها كانت بالفعل ملاك حتى

جاء شخص آخر غيّر حياتها بأكملها واصبحت بشر من بعده .. كان خالد بالنسبة لفريدة هو الإنسان الصحيح في الوقت الخطأ وكان عمرو هو الإنسان الخاطئ في الوقت الصحيح ولكن السؤال الذى يجب ان يُطرح هل نحن من نتحكم بالوقت أم الوقت هو من يتحكم فينا ؟

ومر العام أسرع من البرق وتجمعت الفتيات نور ونهى وفريدة احتفالاً بتخرجهم وأنهم أصبحوا أحراراً وأنهم أيم تفصلهم عن إتمامهم سن ال واحد والعشرون ليخططوا للمستقبل سوياً وقد بدأت نور بالإحباط وهى تقول: أنا هوافق على العريس اللى متقدملى وهبدأ معاه حياتى واهو أصلاً ما يعرفش عنى أى حاجة ودى أحسن حاجة

فريدة: بالسهولة دى انتى قررتى انك توافقى على واحد ما تعرفيش أى حاجة عنه ولا حتى طباعه ما تعرفيش عنه غير انه مناسب اجتماعياً انه يكون جوزك بس كده ؟

نور: انتى شايقة أى حل تانى غير كده ؟

نهى: فلكك منها يا ديدى هى أصلاً معروف عنها ان اخرها انها هتتجاوز وتقعده فى البيت انتى لسه مصممة على السفر ؟

فريدة: دة أحسن حل انتى بنفسك قولتيلى ان اللى زيى ما ينفعش
يعيشوا فى مصر أروح اشوف مستقبلى أكمل دراستى أعمل ماستر
ودكتوراه واشتغل وابقى حاجة انتى هتعملى ايه ؟

نہى: هحارب أهلى زى ما قولتيلى وهروح القاهرة وهشتغل صحفية
لحد ما أبقى كاتبة كبيرة وتسمى عنى وانتي برا

فريدة: انتى كده جدعة

نہى: طيب فكرى شوية انك تعيشى هنا أنا مش عايزاكي تسافرى يا
ديدى خليكى جنى

فريدة: ما أنا هفضل طول عمرى جنبك سواء هنا أو هناك بس أنا
حقيقى محتاجة انى أبعد عن مصر كلها عايزة ابدأ لوحدى من أول
وجديد

نور: ربنا يوفقك ياختى بس لازم تحضرى فرحى قبل ما تسافرى

فريدة: دى الحاجة الوحيدة اللى أقدر أوعدك بيها

نہى: خلاص يا نور مكتوبلك نحضر فرحك

نور: وانتي كنتى عايزه ما تحضريش ؟

نہى: بهزر مالك !

فريدة: طيب أنا لازم اسيبكم وامشى

نهى: رايحة فين ؟

فريدة: هشوف أحمد تيجي معايا ؟

نهى: واحشنى جدًا هاجى معاكى اه

نور: طيب روحوا و عرفوه ان فرحى هيبقى قريب

فريدة: ده على أساس انه كده قلبه هيرق والكلام دة انسى بقى انتى
بعد اللى عملتیه ملكيش مكان فى قلبه

نور: زى ما عمرو مبقاش ليه مكان فى قلبك ؟

فريدة: عمرو ما عملش اللى انتى عملتیه وبعدين انتى عارفة كويس
قوى انى لو عايزة ارجع لعمرو كنت رجعتله لكن انتى لو عايزة
ترجعى لأحمد عمرك ما هتعرفى وكفاية تجريح ولا ايه ؟

نهى: كفاية يا بنات يلا بينا يا فريدة

فريدة: يلا بينا.

العام الذى سبق حُبك كُنْتُ طفلة.. العام الذى أحببتك فيه صرْتُ
شابة

والآن بعد أن مات فينا الحُب شاخت ملامحى و بدوت كالعجائز!

كانت فريدة مازالت تكلم عمرو داخلها كانت تريد أن تقول له أشياء كثيرة لكن أفاقت عندما كانت تقول لها نهى: يلا وصلنا

فريدة: طيب هكلم أحمد اشوفه وصل فين

وبعد أن اتصلت فريدة بأحمد قال لها أنه على وصول فقالت لنهى: هنستناه لسه ما وصلش

نهى: طيب يلا ندخل

وبعد أن دخلوا المكان نهى كانت تريد أن تسأل فريدة إذا كانت تفكر بكلام نور وقالت: لسه متضايقة من اللى نور قالته

فريدة: لا نور هبلة مش باخد بكلامها ما انتى عارفة

نهى: طيب لما انتى مش بتاخدى بكلامها ليه بقالك سنتين يا فريدة مش انتى فريدة اللى أنا اعرفها من يوم ما سيبتى عمرو

فريدة: هو صحيح مفيش حد بي موت علشان حد !!

بس فى حد ممكن يعيش طول عمره " مش سعيد بسبب حد ..

وده و الموت ،، ما يفرقوش عن بعض كثير

نہی: طیب واخرتها ؟

فريدة: هسافر وانسى وهحب واعيش

نہی: قصدك هتہربى

فريدة: لا بس هبعء

نہی: مفكرتيش تديله فرصة تانية ليه يا فريدة ؟

فريدة: عشان أصلاً مش هينفع .. مش هينفع ابقى مع حد يبسمع أى كلام وخلص مش هينفع هيبقى فى جويا حاجة مكسورة عمرها ما هترجع زى الأول كده أحسن هو هيلاقى اللى شہه وأنا مسيرى هلاقى اللى شہى

نہی: طيب ما اللى شہك موجود بس انتى اللى مش عايزة تقربى

فريدة: قصدك مين ؟

نہی: مروان اللى معاكى فى النادى

فريدة: يا بنتى أنا مقررة انى هسافر وما ينفعش أقرب من حد وأنا عارفة انى همشى

نہی: بس كده ؟

فريدة: وبعدين اللى انتى ما تعرفيهوش انى أصلاً ادبت فرصة لمروان
وهو اللى قرر يبعد وبعد كده حاول يقرب تانى وأنا كبرت دماغى

نهى: عشان كان بيفكر يا فريدة مش أكثر

فريدة لا فكك أنا بقى ما عنديش روح للكلام ده كل اللى بفكر فيه
امتى هخرج من البلد دى

وسرحت فريدة وسألت نفسها هل أنا حقًا بهذا السوء الذى يجعلنى لا
أستطيع الاحتفاظ بأحدهم أم أنها الدنيا فقط !

فدخل أحمد وقطع حبل أفكار فريدة ونهى وقال: وحشتونى يا بنات
عاملين ايه ؟

فريدة ونهى فى نفس ذات الوقت: كويسين وانت ؟

أحمد: تمام تمام, مبروك على التخرج عقبال الشغل والجواز والذى
منه

فريدة: الله يخليك يا اخويا انت عامل ايه فى شغلك وحياتك قولى ايه
الجديد ؟

أحمد: مفيش أى جديد انتى هتعملى ايه بعد التخرج وانتي كمان يا
نهى؟

نهى: لسة قدامى حرب كبيرة مع أهلى عشان أقدر اقنعهم بأفكارى وان
جيلى غير جيلهم والذى منه وأول ما أكسب الحرب هروح القاهرة
عشان هشتغل فى الإعلام هكون كاتبة بس يا سيدى

أحمد: وانتى يا فريدة ؟

فريدة: هسافر هشتغل وهكمل دراستى وهكون ذات سلطة فى يوم من
الأيام واقابلكم بعد بيحى عشرين سنة كده اشوف كل واحد فىنا
وصل لفين وحقق ايه من اللى كان بيتمناه, انت اللى هتعمل ايه ؟

أحمد: أنا اشتغلت ودى كانت أول خطوة وبعدين هدور على واحدة
زيك اتجوزها عشان هى اللى هتكون مخلصه وهتصون بيتى وعمرى
ما هقف فى طريقها ونجح سوا بس انتى هتسيبى أفنان لوحدها ؟

فريدة: غصب عنى دى مش أنانية منى والله بس هديها فرصة تعيش
حياتها والله لقت الإنسان اللى هتكمل معاه يبقى ربنا يسعدها ما
لقتهوش هبعثلها عشان تقعد معايا ويبقى قدرنا اننا نكمل حياتنا
سوا

نهى: هتقدرى تبعدى عنها ؟

فريدة: والله البعد عمره ما كان سفر ولا القرب عمره ما كان مكان
والتكنولوجيا قربت المسافات اه هيكون صعب انى أعيش لوحدى
بس عشان احقق ذاتى لازم اتعب ولا ايه ؟

نهى: عندك حق

أحمد: ربنا معاكم يا بنات

فريدة: ومعاك يا بيبي

نهى: هقولك حاجة معرفش مهمة ولا لأ بس حاسة انى لازم اقولها

أحمد: قولى

نهى: نور هتتجوز

أحمد: وأنا مالى

نهى: حبيت أعرفك

أحمد: بصى يا نهى اللى زى نور دى اخرها فى الحياة انها تتجوز واحد
قرطاس يبقى مش عارف عنها أى حاجة وهى بتعمل كل اللى هى
عايزاه من وراه حتى لو حبسها بين اربع جدران فهى قادرة على انها
تعمل كل حاجة هى عايزاها إن كيدهن عظيم

نهى: أنا مش عارفة اقولك ايه بس يمكن لو كانت نور ما دخلت
حياتك ما كنتش اقتنعت ان البنات مش باللى بتظهره بس البنات
باللى بتعمله بجد فى حياتها

أحمد: عندك حق تجربتي مع نور غيرتني كثير وربنا يوفق كل واحد في حياته, عارفه يا فريدة لو ما كنتيش زي اختي كنت كتبت عليكى يا بت أنا دلوقتى عرفت انك خسارة فى أى حد مش مقدر انتى ايه

فريدة: تعيش يا غالى بس أنا دلوقتى همى كله انى ابقى حاجة مش ان يبقى فى حد فى حياتى بس صدقنى يوم ما أفكر وانت لسه مفيش فى حياتك حد هاچى اقولك تتجوزنى يا اخويا

وكانت هذه نهاية اليوم بالنسبة لفريدة كانت سعيدة بتغير آراء أحمد ونهى كثيرًا وكانت سعيدة ايضًا ببعدها عن نور بعد ان اختارت طريقها وكانت قد قررت ان اخر علاقتها بنور هى إتمام زواجها ثم بعد ذلك لن تراسلها كثيرًا عندما تسافر

وبعد أسابيع قليلة كانت فريدة انجزت كل الأوراق المطلوبة للسفر وكان زفاف نور بعد أيام قليلة ونهى كانت قد وجدت عمل يناسبها وسكن بقربه كانت أمنية فريدة الوحيدة أن تقابل عمرو قبل سفرها كانت تحتاج لصدره يضمها بشدة وتبكي داخلة كانت تريد أن تشعر أنها ملاك لأخر مرة لكنها على الرغم من ذلك كانت تحاول أن تنشغل بأى شىء اخر حتى تتخلص من تلك الفكرة لكنها كانت لا تعلم أنها سوف تراه فى زفاف نور وأن حلمها بضمه منه أقل بكثير مما سوف يحدث ليلة زفاف نور, وبعد أيام كان موعد زفاف نور قد أتى وقد

تزينت فريدة وارادت اجمل فستان لديها كأنها هي العروس ليست صديقتها وذهبت مع نهي حتى تكون قد أتمت مهمتها مع نور على اكمل وجه وتفاجأت بوجود عمرو من ضمن الحضور .. كان من الصعب جدًا ان تعامله كأنه غريب وهي في أشد الحاجة لقربه منها في هذه الفترة والأصعب هو أنها لم تتوقع أن تكون نور على علاقة بعمرو حتى الآن لتدعوه على زفافها فمر على فريدة شريط ذكرياتها مع عمرو أمام عينها وكانت تتأمل كل يوم كانت تقضيه معه واكتشفت أن كل ضحكة كانت تعلق صوتها كانت معه وكل فرحة كانت مرتبطة به كل شيء جميل مر على فريدة في حياتها كان في وجود عمرو فترجع إلى الحاضر في ثواني بسبب صوت نهي وهي تسألها وتقول: ليه ؟

فريدة: ليه ايه ؟

نهي: ليه عايزة تبوظي مكياجك والكحل يسبح من عنكي عشان شفتيه وسرحتي في أيامكم ليه

فريدة: كان واحشني جدًا واكتشفت ان كل حاجة حلوة في حياتي مرتبطة بعمرو

نهي: لولسه بتحببيه ارجعيله يا فريدة

فريدة: ما أنا قلتك لو كان ينفع كنت عملت كده بس أنا كنت ناسية
حاجة مهمة ما كنتش بفكر فيها وأنا مع عمرو اسمها نفسى ولما
افتكرتها اكتشفت انها أهم من أى شىء لازم احقق ذاتى واثبت
نفسى يا نهى عشان احس انى انتصرت لما اشوف أنا حققت ايه فى
حياتى

نهى: وما فكرتيش فى عمرو ؟

فريدة: عمرو معندوش طموح زى بس على الرغم من كل حاجة نفسى
احضنه قوى فوق ما تتخيلى

فيقطع كلامهما عمرو وينظر لفريدة ويقول لها: ممكن تنسى أى حاجة
وتقبلى انك ترقصى معايا على سبيل انى واحد انتى ما تعرفيهوش ؟

تنظر فريدة لنهى وعينها تلمع من شدة إخفاء الدموع فترد عليها نهى
بنظرة عينها لتقول لها منها أن تقبل ذلك على الأقل تكون حققت
جزء من حلمها، فتقبل فريدة الرقص مع عمرو وتقول له: موافقة

فأخذ بيدها وبدأوا الرقص ولكن لأول مرة لم تبارك السماء رقصهم
لأول مرة لم يرقصوا تحت المطر سواء كانت السماء تبكى لهم فرحاً
ام حزناً فنظر عمرو إلى فريدة بشدة فسألته فريدة قائلة: بتبصلى
كده ليه ؟

عمرو: بشبع منك عشان عارف ان دى المرة الأخيرة اللى هشوفك فيها

فريدة: وليه بتقول كده ؟

عمرو: هو انتي فاكرة أنا هنا في فرح نور ليه ؟ من امتي بقينا اصحاب
عشان تعزمتي على فرحها؟

فريدة: قصدك تقول انك جاي علشانى ؟

عمرو: نور عزمتني يا فريدة عشان اشوفك قبل ما تسافري عشان
عارفة اني كنت هموت لو سافرتي من غير ما اشوفك

فريدة: محدش بيموت من غير حد يا عمرو

عمرو: هو صحيح مفيش حد بيموت علشان حد !!

بس في حد ممكن يعيش طول عمره " مش سعيد بسبب حد ..

وده و الموت ،، ما يفرقوش عن بعض كثير مش ده كلامك !

فريدة: واخرتها يا عمرو ؟ أنا هسافر وانت لازم تنساني روح شوف
حياتك هتلاقي واحدة تانية تحبك و تديك أكثر ما كنت تتمنى على
الأقل يبقى قلبها أبيض وتقدر تسامح على أى شىء

عمرو: بس محدش بيسامح حد يا فريدة غير لما يكون ملاك وأنا عمري
ما هلاقي ملاك غيرك يا فريدة أنا عايزك انتي مش عايز حد تاني يا
ملاك

فريدة: بس أنا عمري ما كنت ملاك انت اللى كنت حابب انك تشوفنى
كده ما بقتش فريدة اللى انت تعرفها يا عمرو .. فريدة غفلى انت
كنت تعرفها ماتت يوم ما شكيت لحظة فيها واتخلقت مكانها واحدة
أقوى معندهاش مشاعر أصلاً

وانتهت الموسيقى وتوقف الجميع عن الرقص فطلب عمرو من فريدة
شئ لم تكن تتوقعه وقال: فريدة أنا هخرج من هنا دلوقتى هستناكى
برا بعد الفرح ما يخلص لو ليا خاطر عندك لسة ولو 1% كملى
معايا اليوم ارجوكى

فريدة: هنشوف يا عمرو عن اذنك

وذهبت فريدة لنهى لتحكى لها ما دار بينها وبين عمرو خلال الرقصة
وتسألها هل إذا أكملت مع عمرو اليوم حتى طلوع النهار سيؤلمه أم
تمشى وراء مشاعرها وتقضى معه ليلة الوداع فقالت لها نهى: روحى
يا فريدة يمكن قلبك يحن عليه وتغيرى رأيك وتفضلى هنا

فريدة: عمري ما أرجع عن اللى فى بالى أبداً

نهى: بس اعرفى .. لو ضيعتى الحب وهو فى ايدك عمره ما هيرجعلك
أبداً, فى ناس بتحلم بس تلاقيه وناس لما بتلاقيه بترميه واللى يرمى
النعمة تزول منه وانتي لو سيبتي عمرو هتبقى من الناس دى

فريدة: الحب مش بيبنى حياة يا نهى .. الحب وهم وأنا اتوهمت مرة ما
عنديش استعداد أتوهم تانى أبدًا ! واللى يعلق نفسه باللى راح عمره
ما هيعيش اللى جاى وأنا لازم أعيش اللى جاى !

نهى: طيب ولما انتى محددة موقفك هتقابليه ليه ؟

فريدة: عشان عمرو بالنسبالى زى الخمرة وأنا محتاجة أشرب اخر كاس
واتوب !

نهى: ما قليلة مسكر فكثيره حرام .. حرام تتعبى نفسك وتتعبيه يا
فريدة حرام

فريدة: غصب عنى هتحرم منه باقى العمر مستكتره عليا ليلة أعيشها
معاه قبل ما أسافر

نهى: أنا خايفة عليكى مش اكثر

فريدة: مش هتوجع أكثر من الوجع اللى اتوجعته .. قلبى كده كده
متغربل ولا رصاصة زيادة هتأثر فيه

نهى: روحى يا فريدة روحى

فريدة: هتقولى لنور أنا مشيت ليه

نهى: هتصرف روحى وهشوفك بكرة بالليل وأنا بوصلك للمطار روحى

فريدة: ما تخافيش عليا

وذهبت فريدة إلى عمرو لتركب معه السيارة وتجلس بجواره وتسأله في نفسها لماذا عندما نتعاهد على البعد نقترّب أكثر؟ فيرد عمرو في داخلة ويقول بغيابك أدركت كيف تخرج الروح دون الموت يا فريدة ليتوقف عمرو على البحر وتنزل فريدة من السيارة وتقول له : عمرو!

فرد ويقول : نعم

فريدة: منك لله

عمرو: ليه ؟

فريدة: عشان انت اللى خليتني أحبك قوى كده لا أنا عارفة أكرهك وانساک ولا قدرة أسامحك واعيش

عمرو: خلاص فات الأوان اللى تقولى فيه أى كلام يا فريدة انتى اختارتى

فريدة: مش بأيدي ولا كان ده ذنبى .. ولا كان ده ذنبك .. خبطنا ف بعض فجأة انكسرنا !

عمرو: واللى انكسر عمره ما بيرجع عشان كده أنا ساكت يا فريدة ساكت عشان أنا كمان حبيتك زى ما يكون عمرى ما شفت ولا

هشوف بنات غيرك على الرغم ان في أحلى منك مليون مرة بس عيني
مش بتشوف غيرك يا ملاك

فريدة: بص يا عمرو الحاجة الوحيدة اللي أنا واثقة منها انى لا عمري
هنسالك ولا هحب بعدك بس أنا عشان راسمة حياتي ان ما يكونش
فيها مجال للحب أما انت لازم تنساني وتعيش حياتك بعدى عادى
وتحب وتتحب وتتجوز

عمرو: واجيب بنت واسمها على اسمك وشغل الافلام الهندى ده

فريدة: لا مش هتسمها على اسمى هتسمها الإسم اللي كنا متفقين
عليه أنا وانت لما كنا هنخلف بنوتة

عمرو: هو أنا ممكن أحضنك

فريدة: من امتى وانت بتسأل يا عمرو ؟

عمرو: عشان زمان كان كل حاجة من حقى لكن دلوقتى أنا لازم
استأذن

فريدة: الكلام ده لو أنا كنت بقيت لحد تانى لكن انت عارف ومتأكد
انى هفضل بتاعتك يا عمرو ولا نسيت ؟

ضمها بقوة إلى صدره وقبل شفيتها وتحسس صدرها وخصرها وكل
جزء بها وقال: ليه تضيّعي كل حاجة بيننا علشان شوية خرافات
فريدة أنا بحبك وما أقدرش أعيش من غيرك ما أقدرش أتخيل إني
ألمس واحدة غيرك هشوفها انتي مش هي، هنادي عليها بإسمك مش
بإسمها انتي لو قررتي فعلاً انك تسافري هتظلميني معاك

فترد فريدة وعينها تزرع دمعها وتقول: وانت فكرك ان بعد ما اديتك
كل حاجة وبقيت في يوم من الأيام ليك ممكن اسمح لحد تاني يحط
ايداه على جسمي ؟

عمرو: طيب ليه بتعملي كده

فريدة: عشان انت قولت من شوية اللي بيتكسر عمره ما يرجع تاني زي
الأول حتى لو لصمّناه، قول للي انكسر أنا اسف لو رجع زي ما كان
أنا هرجع

عمرو: طيب حاولي

فريدة: هتجنبي طول العمر

عمرو: خليكي جنبي باقي العمر وانت تعرفي

فريدة: طيب يلا روحني

عمرو: هستناكى حتى لو سافرتى هستناكى ترجى لما تقدرى تسامحى

فريدة: يبقى انت اللى هستنى باقى العمر وانت لوحدك

عمرو: لما اوحشك هترجى يا فريدة

فريدة: أنا كنت معاك دلوقتى عشان اشيع منك وحتى لو وحشتنى وده
شئ أكيد هغمض عينى واتخيلك قدامى

عمرو: هترجى

فريدة: هستنى

ركبت فريدة مع عمرو حتى يوصلها إلى المنزل ففتحت الراديو لتكسر
الصمت الرهيب الذى حل فإذا بالصدفة ترسل لفريدة الأغنية
المناسبة لتمهيداً لعمرو وكانت I'll always love you Whitney
Houston فتغنى فريدة مع الأغنية وهى تنظر لعمرو لأن كل كلمة هى
حقاً تريد أن تقولها له

,If I should stay

إذا بقيت,

.I would only be in your way

سأصبح عقبة في طريقك.

So I'll go, but I know

لذلك سأرحل, ولكنى أعلم

.I'll think of you ev'ry step of the way

سأفكر فيك في كل خطوة في طريقى.

.And I will always love you

وسأحبك دائماً.

وظل عمرو بعد أن أوصل فريدة إلى المنزل على أمل أنها في يوم من الأيام تشتاق فتأتى إليه مرة أخرى وكانت فريدة تودع عمرو لأنها تعلم أنها لن تراه مرة أخرى وكانت قد أشبعت رغبتها في لقاءه لأخر مرة في العمر وقد حان الوقت لتودع غرفتها وتودع أمها وتوصيها أن تحاول أن تعيش حياتها التي أفنتها حتى تصبح فريدة شابة لتعتمد على نفسها وتقول لها إن لم تستطع أن تلتقى بنصفها الآخر بعد أن مرت الأربعين تحجز تذكرة سفر لها لتذهب إليها ويكون القدر في هذا الوقت قرر أن يَمْضُوا حياتهما سوياً إلى اخر العمر

وفي اليوم التالي كان موعد طائرة فريدة بعد ساعات قليلة وكانت نهى
وأفنان وأحمد سوف يذهبون معها إلى المطار وكانت فريدة تعلم دومًا
أن هناك شيء ناقص ،

والدُّ غائب ، إخوة مُغتربون ،

صديقات راحلات ، وحبیبٌ لا يمكنه الإقتراب !..

لكن رغم ذلك كانت تتحمل متاعبها حتى تستطيع أن تكمل مشوارها
الذي قررت أن تبدأه بالسفر وتبدأ مرحلة إثبات الذات ومشوار
الألف ميل

ووصلت فريدة إلى باريس ، مدينة الأحلام لتبدأ مرحلة جديدة من
العمر، وفي المطار كانت سارة في انتظارها.. سارة كانت زميلة فريدة
من أيام الدراسة كانت تقيم في مصر ثم نقلت إقامتها إلى باريس لأن
امها فرنسية من أصل مصري ووالدها مصري كانت فريدة تراسلها
دائمًا وعلى علاقة طيبة معها وهي من ساعدت فريدة في كل شيء في
باريس حتى استقرت أمورها ووفرت لها سكن بجانب العمل الذي
وفرت له أيضًا في مجال الصحافة وعرفَّتْها على أصدقاء جدد من
أصول عربية حتى لا تحس بالغرابة. كانت فريدة تبدأ من أول وجدديد،
نقطة ومن أول السطر هذه كانت حياة فريدة في باريس دراسة في

الصباح وعمل في النصف الآخر من النهار لا شيء غير ذلك وفي نهاية الأسبوع تقضى العطلة مع سارة وأصدقائها حتى كونت هي صداقات.

ومر عامين على هذا الحال لا يوجد أى تغير حتى انتقلت فريدة إلى العمل في وكالة أنباء شرقية كبرى كل من يعمل بها من الجالية العربية في فرنسا وقد أسست هذه الوكالة لإثبات كفاءة العرب في الوسط الغربي كانت فريدة قد انتهت من الماجستير وتستعد لمرحلة الدكتوراة وكان رئيس فريدة في العمل شاب في منتصف العقد الثالث من العمر يُدعى حافظ كان يُذَكِّرُهَا دائماً بعمرو كان يوجد تشابه بينهم في الملامح والطباع، لبناني مصري الجنسية كان يقيم في باريس من أجل عمله متزوج من فرنسية وقيم معها.

بدأت علاقة صداقة بين حافظ وفريدة بحكم العمل وبحكم أنه رئيسها كانت فريدة معجبة بشخصيته للغاية بحكم الشبه الذى بينه وبين عمرو كانت كلما تحاول عدم التفكير في عمرو كان حافظ يُذَكِّرُهَا به بتصرفاته وأسلوب حديثه وذات يوم طلب حافظ من فريدة أن يخرج معها بحكم صداقتهم وزمالتهم ووافقت فريدة وذهبوا لأحد المقاهى بعد انتهاء العمل وكان الحوار بينهم كالاتى:

-تشرى ايه ؟

-مممكن اخد قهوة

-ايه سر حبك الشديد للقهوة غلط عليكى

-أنا بحبها بحب طعمها وريحتها وكل أنواعها

-بس كترها غلط

-أنا عارفة بس مدمناها

-زى السجاير كده

-أهو السجاير والقهوة دول عشقى فى الدنيا دى

-بس كده تعجزى بدرى

-مين اللى قالك المعلومة دى ؟

-اسألى أى دكتور وهو يقولك

-مش شرط لكل قاعدة شواذ وأنا اللى زى عمر ما القهوة والسجاير

هما يبقوا سبب انى أعجز بدرى لأنى دايماً مهتمة بنفسى

-دى ثقة ولا غرور؟

-لأ ثقة بزيادة

-طيب يا ستي قوليلي بقى ايه اللي جابك أصلاً باريس وهربانه من ايه
هناك

قبل أن ترد عليه فريده بدأت أغنية je suis malade في المقهى فقالت
له فريده : اسمع كلمات الأغنية دي كويس وانت تعرف أنا من ايه
هربانه وايه حالتي وبدأت فريده تغنى مع الأغنية وتتمتم بالكلمات

وعندما انتهت الأغنية كانت فريده تمسح دموعها التي سألت وتقول
لحافظ : دي كانت حالتي عشان كده كان لازم أهرب مش هقدر
أقولك انى خقيت منه بس بقيت أحسن زى ما يكون عندك دور برد
شديد وفي حرارة والحرارة راحت وبدأت تتحسن لكن في كحة

حافظ: هو لسه في حد ممكن يوصل للمرحلة دي بسبب حد ؟

فريده: تخيل لسه في

حافظ: لا أنا محتاج أفهم كل حاجة ايه لو ما عندكيش مانع .. ليه
بعدتوا عن بعض ؟

فريده: نصيب .. وبدأت فريده بالحديث عن عمرو وعن حياتها في مصر
وما دار فيها بكل التفاصيل حتى سرقهم الوقت ولم يشعروا فعندما
انتهت فريده قالت: صدعتك أنا عارفة

حافظ: بالعكس ده أحلى صداع أنا كنت حابب انى أعرف عنك كل
حاجة

فريدة: واهو اليوم خلص وأنا بس اللي اتكلمت

حافظ: بكره زى النهاردة فاضية بعد الشغل أصدعك أنا ولا وراكى
حاجة ؟

فريدة: هيكون ورايا ايه .. أنا حياتى هنا تقتصر على الدراسة والشغل
وأروح أكلهم فى مصر وأنظمن على أمى وأصحابى واخر الأسبوع بنزل
مع سارة وأصحابها وزمايل لينا هنا وبس

حافظ: دة ايه الروتين الممل ده

فريدة: عمري ما كنت إنسانة روتينية غير هنا

حافظ: سيبيلى نفسك خالص بقى من هنا ورايح

فريدة: بس اخاف اسبيلك مشاكل فى البيت

حافظ: بكرة لما أصدعك أنا هتعرفى إن عمر ما هيكون فى مشاكل أصلاً

فريدة: اتفقنا

حافظ: يلا علشان أوصلك

وبعد أن أوصل حافظ فريدة وذهب إلى البيت ظلَّ يُفَكِّرُ فيها بشدة هل من الممكن أن يكون أرسلها له القدر لتُغَيِّرَ حياته أم أنها مجرد صديقة ستخفف عنه أعباء الغربة والحياة.

وفي اليوم التالي استيقظت فريدة لتراسل أفنان ونهى في مصر وتطمئنهم عليها وقد كانت أفنان وجدت شريك الحياة الذي غيَّرَ لها مسار كل شيء وتزوجت منه ونهى كانت في القاهرة تعمل بِجِدِّ حتى تُثَبِّتَ نفسها أمام عائلتها والعالم وأحمد قد وجد بنت في مواصفات فريدة كما تمنى لكنه لم يصارحها بحبه بعد، كانت فريدة تخاف أن تسأل عن أحوال عمرو لكن أحمد كان يوافقها بالجديد دون أن تسأل وهي ترد وتقول أنا لا اهتم كانت صفحة في الماضي وقد أغلقت .. انتهينا. ثم ذهبت فريدة إلى العمل وبعد انتهاء اليوم ذهبت لنفس المقهى لتقابل حافظ

حافظ: عندك تأخير 5 دقائق

فريدة: اخصملى ثمن يوم يا فندم

حافظ: تشربى ايه ؟

فريدة: قهوة

حافظ يطلب من الجارسون قهوة إضافية لفريدة ثم يبدأ بالحديث

ويقول: عندك فضول تعرفى عنى ايه بقى ؟

فريدة: احكى اللى انت حابب انى أعرفه

حافظ: بصى يا ستى أنا حافظ، مامتى لبنانية وأبويا مصرى عيشت فى مصر عمرى كله وكنت بروح زيارات بس لبنان علشان أهل مامتى ولما كبرت قررت أكون صحفى وجيت فرنسا من 5 سنين تقريبًا كان عندى مشكلة فى الإقامة اتجوزت مريان عشان هى حبتنى وقررت تساعدنى فى موضوع الإقامة بس أنا عمرى ما حسيت بيها وكان جوازنا مشروط انى لو ما حبتش هفضل متجوزها بس من غير أولاد لكن لو لقيت الإنسانية اللى تناسبنى هنفصل

فريدة تقاطعه وتقول: بس انت كده بتظلمها وهى ذنبا ايه ؟

حافظ: ذنبا انها حبتنى وافقت عشان تكون معايا وخلص والعلاقة بيننا فى البيت اخوات ليس إلا كل واحد فينا عايش فى جناح خاص بيه

فريدة: فرقت ايه انت عن أى رجل شرقى بتستغل الموقف والظروف؟

حافظ: هى لو كانت حابة اننا ننفصل كانت طلبت وأنا عمرى ما كنت هعارض ده أبدًا

فريدة: من غير ما تحب أو ترفض انت ظالم

حافظ: ظالم ظالم بس أنا لما اعرفك عليها هتعرفي وجهة نظرها هي
حاسه باللمة وأنا معاها هي وحيدة وأنا بشاركها حياتها بشكل أو
بأخر لكن مش متجوزين غير على الورق بس

فريدة: ده مش سبب برضو انت لو انفصلت عنها مش يمكن هي تحب
حد تاني ويبقى جوزها بجد وتعيش حياة طبيعية

حافظ: ممكن بس لو هي كانت حابة كده كنت عملت كده, بصي أنا
وهي حياتنا معقدة شوية وممكن تفتكري فعلياً اني ظالمها بس لو
اللي قدامك أصلاً مش بتتمنى حاجة منك غير انك تظلمه بما انك
مش قادر تحبه فأى حاجة منك حلوة انتي فاهمة

فريدة: فاهمة بس أنا من رأيي انك تنفصل عنها يمكن ده يتيح لها ان
ممكن يكون في حد تاني في حياتها

حافظ: هنشوف

فريدة: اسمها هنشوف

حافظ: هو احنا مش بقينا في حياة بعض يبقى اسمها هنشوف

فريدة: احنا اه أصحاب بس دي حياتك انت مش حياتي أنا, انت اللي
لازم تاخذ فيها قرار

حافظ: ما أنا من هنا ورايح مش هاخذ قرار في حياتي غير لما تكوني موافقه عليه

فريدة: ده من ايه ؟

حافظ: عشان أنا حابب أشاركك في قراراتي عندك اعتراض ؟

فريدة: لأ مش كده بس تشاركني بمناسبة ايه أنا ابقى ليك ايه؟

حافظ: مش عايز أحدد انتي هتكوني في حياتي ايه يا فريدة أنا حابب شخصيتك اختاري انتي المسمى اللي هتبقى في حياتي بيه وأنا مش هعترض

فريدة: احنا أصحاب وهنبقى أصحاب مقربين أنا حابه ده

حافظ: وأنا موافق على فكرة, بصى بعيداً عن انك عجبانى كأنثى وعاجبني فيكي اسلوبك وطريقتك وشخصيتك بس أنا موافق اننا نكون أصحاب بس لحد لما انتي تقرري أو تحسى انك عايزانى بشكل تاني

فريدة: انت طبيعي راجل شرقي فمن الطبيعي انك لازم تفصصني بس أنا عاجبني فيك حاجات وحاجات لأ وأنا هاخذ على عيوبك قبل مميزاتك

حافظ: بالظبط كده خد صاحبك على عيبه, بس خليكي عارفة انى
أتمنى انك تكونى شريكة حياتى

فريدة: عزيزى..

أنا لا أجد الطبخ وتعليمى قد يأخذ وقتًا

أجد صرف النقود بشكل جيد

أقضى معظم وقتى بالقراءة والكتابة وخارج منزلى

أحب مناقشة الأدب ولا أحب مشاهدة الأخبار

أعشق السمار وفتنته

أعانى فى بعض الأيام من أرقٍ حاد

وعادة أشعر بالدوخة من المواصلات

عصبية, أضحك لوحيدى أحيانًا

غيرتى قاتلة فلا تتعجب إن غرْتُ عليكِ مِنْ ظِلِّكَ

وبى من العناد ما يكفى دولة

وستعلم أنى حزينة عندما ترانى لا أتحدث

هذه بعض من سيئاتى !

أمازلت تودنى شريكة العمر؟

حافظ: لا سأعاود التفكير مرة أخرى

فريدة تضحك بشدة وتقول: شفت بقى

حافظ: لأ بجد انتى ليه ما فكرتيش تكملى فى مصر وتتجوزى الحياة
أكيد ما كانتش هتقف على حد

فريدة: عشان أنا اتخلقت فى الدنيا دى عشان أحقق ذاتى مش عشان
أنا بنت هكون زوجة ثم أم ثم أتحول لست بيت بكرش ومعفنة !

أى ولد بيعرفنى ويعرف أفكارى يقول الله كم انتى عظيمة والكلام الحلو
ده كله و فى الآخر بيروح يتجوز البنت اللى اتخلقت عشان تكون
زوجة وأم .. الخ

عشان الست دى هتسمع الكلام وتطيعه مهما كانت بتدّلع عليه
وبتعمل شوية حاجات هى عايزاها لأ ده بيبقى بمزاجه لكن أنا اللى
زى اتخلق عشان يقول لأ .

عشان كده أنا عارفة ان عمرى ما هتجوز أو يكونلى أصحاب دايمين
طول العمر

حافظ: مش شرط ممكن تلاقى اللى زيك

فريدة: لو لقيته بقى

حافظ: بس انتى ازاي بتفكرى كده انتى كل ما بعرفك أكثر بتبهرينى أكثر
بعمق تفكيرك للأمور, واحده غيرك كانت جرّبت مش يمكن تعرفى
تتأقلمى !

فريدة: قصدك أمشي مع الموجة, أنا ما اتخلقتش عشان كده أنا جيت
الدنيا دى عشان هدف ولازم أحققه

حافظ: واللى هو؟!

فريدة: انى اكون قدوة لغيرى ده فى حد ذاته ممكن يخليك تفنى حياتك
كلها عشان تثبت وجهة نظرك انها صح حتى لو كانت مرفوضة

حافظ: بس انتى جيتى لمجتمع يناسبك وسيبتي مجتمعتك اللى المفروض
تعملى فيه كده

فريدة: لأ مش كده بص أنا مثلاً بعد 15 سنة هيكون عندى 40 سنة أو
أكثر هيكون أصحابى اللى فى مصر خلفوا وأكد فيهم بنات لما ارجع
أعيش فى مصر هشوفهم وهما فى أهم مرحلة فى حياتهم اللى هى
تحديد المصير هيشوفونى قدامهم لو هما عايزين يكونوا حاجة
هياخدوا منهجى وأنا هقولهم أنا خسرت ايه مقابل اللى حققته

وهيقارنوني بأهاليهم ويشوفوا الخسارة والمكسب وهياخدوا الطريق
الى هما هيقنتعوا بيه يا النور يا الضلمة وأنا على أمل ان الأجيال
الى جاية فى الشرق الأوسط تعيش فى النور وما يبقاش فى حاجة
مخوفاهم أبدًا لا مجتمع ولا عادات ولا تقاليد عشان كل ده فتى
وهرى أنا ما ينفعش أعمل حساب للناس الى لو مشيت صح يقولوا
شوفى مدارية ايه وراء الالتزام ده ولو مشيت غلط يقولوا دايرة على
حل شعرها ده من وجهة نظرهم أصلًا أنا شايفه إن الجيل الى جاي
هو هيحدد بنفسه ايه الغلط و ايه الصح ولو عملت الغلط هيضر
مين ولو هيضر حد غير نفسه وهو حابب يعمله مش هيعمله ولو
هيضر نفسه وهو عارف ان ده غلط ممكن يعمله على سبيل
التجربة ليس إلا وفى كل الأحوال هيستفيد من اخطائه ومن أخطاء
الآخرين أما الناس فدول طبيعى بيتكلموا بس الى يديهم أهمية
هيخسر كثير قوى واللى يحط كلام الناس تحت جزمته هيعلى ويبقى
فوق فاهمنى؟

حافظ: تعرفى انى نفسى أشوف مامتك !

فريدة: اشمعنى ؟

حافظ: عشان أشكرها ان هى ربتك صح بس للأسف فى مجتمع غلط
وأنا أتمنى انى أكون معاكى لحد 15 سنة ونقدر نغير مفاهيم مجتمعنا
الى احنا ما قدرناش نغيره دلوقتى أنا معاكى قلبًا وقالبًا

فريدة: انت بتدينى أمل فى بكرة بشكل أنا حبّاه جدًا

حافظ: ومن اللحظة دى هكون أنا الأمل اللى بينورك المستقبل
المشرق بالنسبة ليكى

فريدة: طيب انت ايه طموحك فى الحياة ؟

حافظ: سؤال صعب جدًا تصدقى عمرى ما فكرت فيه

فريدة: لازم تكون محدد أهدافك

حافظ: طيب وانتى محدداها ؟

فريدة: طبعًا

حافظ: طيب قوللى ايه هى طموحاتك

فريدة: وكالة الأنباء اللى احنا بنشتغل فيها دى وانت رئيسى فيها

حافظ: مالها ؟

فريدة: اهم طموح ليا انها تكون ملكى أنا وأكون أنا صاحبة الأسهم كلها

حافظ: مش بعيد على ربنا وايه كمان ؟

فريدة: واخلى الوكالة تكبر أكثر وتكون على مستوى العالم كله

حافظ: وايه كمان ؟

فريدة: واستثمر الفلوس في مشاريع قومية بس ده بقى لما أرجع مصر

حافظ: ممكن أقولك حاجة ؟

فريدة: طبعًا

حافظ: انتي بتعلمي يا فريدة (يضحك ساخرًا منها)

فريدة: على فكرة أنا هحقق كل اللي أنا بقولها لك ده إن شاء الله

حافظ: أتمنى بس أنا دورى ايه معاكى بقى ؟

فريدة: طول ما انت بتتريق عليا عمرك ما هيكون ليك دور

حافظ: طيب والله بتكلم بجد

فريدة: ممكن تكون شريكى لو حابب

حافظ: فى حياتك أنا موافق جدًا طبعًا وخلص أنا موافق على عيوبك

مفيش مشكلة

فريدة: أنا بتكلم انك تكون شريكى فى أحلامي قبل حياتى

حافظ: يعنى أنا لو شاركتك فى أحلامك وحققناها سوا ممكن أكون
شريكك فى حياتك ؟

فريدة: ممكن طبعاً ليه لأ

حافظ: يبقى أنا معاكى يا فريدة فى أى حاجة

ومرت أيام وشهور وبضع سنوات قليلة لا جديد فى حياة فريدة مع
حافظ, هو أحبها بجنون ولكن هى لا تعلم حقيقة مشاعرها تجاهه
إذا كانت تحبه حقاً أم تحب حبه لها فقط بالرغم من أنها ترقص
معه تحت المطر لكنه رقص عابر ليس كأى الرقصات التى كانت
ترقصها مع عمرو, فهى مازالت تبكى وترقص والسماء تخفى دموعها
تحت مياه الأمطار لكنها على يقين أنها تستطيع أن تطرد عمرو يوماً
ما من داخلها وتستسلم لإحساس حافظ بها, كانت فريدة تخاف أن
تقترب من حافظ فتجرح إحساسه وتخاف أن تبتعد بشكل نهائى
فترجع لوحدها.

حافظ قد ادخل البهجة على حياة فريدة وخصوصاً بعد انفصاله عن
زوجته أصبح وقته كله ملكاً لها ولشغله الذى يراها فيه كل يوم
أصبحا لا يفترقان إلا عند النوم يلتقيان فى الصباح مجدداً

وبعد فترة كانت فريدة وحافظ قد اشتروا بعض من أسهم الوكالة وكان
أى مال يقتنوه يحتفظوا به بعيداً عن أيديهم حتى يسطتيعوا
بمجهودهم أن يشتروا أسهم كثيرة من الوكالة لمحاولة تحقيق
أحلامهم المشتركة الآن كان حافظ يفعل كل ما فى وسعه حتى يتحقق
حلم فريدة الذى أصبح حلمه حتى يكون لفريدة حبيباً ليس صديق
فقط إنه يتمنى أن تستغنى فريدة عن الدنيا بأكملها به .. وذات يوم
كانت فريدة تشتاق إلى الوطن بشدة وكانت تشكى لحافظ شدة تعبها
فى الغربة رغم وجوده وتحكى له كم هى تشتاق إلى رؤية أمها
وأصدقاءها وكم هى بحاجة أن تحتضن وطنها وترجع من جديد،
حاول بشدة حافظ أن يخرجها من تلك الحالة الشنيعة فقال لها:
تعرفى انك طفلة صغيرة فى عينيا ودلوقتى كأنك بتطلبى لعبة وأنا
مش هقدر أجيبها لك

فريدة: لا أنا بتكلم بجد أنا محتاجة فعلاً انى احضنهم وارجع على طول
مش عايزة أكثر من كده

حافظ: طيب أنا اقدر أعملك ايه .. أغنيك ؟

فريدة: لا أرجوك صوتك وحش قوى

حافظ: طيب جربى تسمى مش يمكن أغنيك أغنية انتى بتحبها قوى
تنسيكى كل حاجة

فريدة: اطربني اتفضل

فضحك حافظ وبدأ في الغناء لفريدة بصوت عالٍ في وسط الشارع
Oh, her eyes, her eyes make the stars look like : ويقول
they're not shining

Her hair, her hair falls perfectly without her trying

She's so beautiful

وعندما انتهى من الغناء وجد فريدة تضحك بشدة بسبب لفت الأنظار
لهما في الطريق وصفق لهم من رآهم وقال لهم رجل أجنبي ووجه
hey you, this man love you so much he : الكلام لفريدة وقال :
can do anything to see your smile, god bless both of you

فرد حافظ عليه وقال : thanks a lot, you are gift from god to tell
her that

فرد عليه الرجل وقال: no need, you can sing again for her

ابتسمت فريدة بخجل وقالت لحافظ: مش نمشى خليت الناس تتفرج
علينا

فرد حافظ عليهما: بالله عليكمي في أحلى من كده ؟

فقالته فریده: لأ مفیش بجد انت غيّرت يومى بشكل كبير قوى.. شكرًا
على كل حاجة

حافظ: شكرًا على ايه بس .. أنا اتخلقت أصلًا فى الدنيا دى عشان
أسعدك

فریده: مش قوى كده

حافظ: لأ بتكلم بجد أنا أصلًا جيت الدنيا دى عشان ربنا يوعدننى بيكى
يا أجمل هدية بعد صبر كبير قوى عشان أسعدك وبس .. مستكتره
عليا حتى انى أسعدك

فریده: أنا بجد مش لاقية أى كلمة أقولها ليك

حافظ: مش كل الكلام يترد عليه بكلام المهم انك تكونى حساه من
مكان ما قولته

فریده: بس تعرف

حافظ: ايه ؟

فریده: أنا بحب الأغنية اللى انت غنيته دى قوى

حافظ: ما عشان كده أنا غنيتهالك

فريدة: وانت عرفت منين انى بحبها ؟

حافظ: أصلاً إلى بيحب حد بيقتد يدور ويدور عشان يشوف الإنسان
اللى هو بيحبه ده بيحب ايه ويعمله عشان يبسطه

تبتسم فريدة بخجل وتقول: مش يلا بقى عشان نمشى من هنا ؟

فريد حافظ ويقول: ست البنات تحب تروح فين ؟

فريدة: مش مهم المكان .. المكان مش بيفرق قد الأشخاص اللى انت
معاهم

حافظ: ده تصريح مهم جداً واعتراف منك انك بتحبي تكونى معايا

فريدة: وهو أنا بقى ليا حد هنا غيرك

حافظ: يعنى عشان مالكيش حد هنا غيرى ولا عشان انتى بتحبي تكونى
معايا

فريدة: عشان بحب اكون معاك

حافظ: النهاردة يوم تاريخى لازم نحتفل بيه دا أبو الهول نطق يا ناس

فريدة: يعنى أنا ابو الهول ؟

حافظ: لا انتى ست البنات يعنى أجمل واحدة فى الدنيا دى كلها

فريدة: طيب يللا ولا ايه ؟

حافظ: يللا بينا

ومع مرور الوقت أكثر وأكثر كانت فريدة تفكر كثيرًا في أحلامها وعلاقتها مع حافظ كانت تحس بأنها تظلمه بوجوده بجانبها فقررت أن تراسل أفنان وتحكى لها عنه بالتفصيل أكثر وتفكر معها بصوت أعلى لتأخذ برأيها وتناقش معها حتى تحاول أن تتخذ قرارًا حاسمًا في موضوع حافظ أو بمعنى أصح كانت فريدة تريد تشجيع أحد لتتقرب من حافظ لتحاول أن تعطى نفسها فرصة للعيش مرة أخرى فاتصلت بأمها وطلبت منها أن تفتح الإنترنت في الساعة العاشرة حتى تأخذ برأيها في شيء مهم وشرطت عليها بأن تكون وحدها دون أحد بجوارها حتى تستطيع أن تحكى لها كل ما تريد وفي الساعة العاشرة بالضبط كانت أفنان في انتظار اتصال فريدة وبعد دقائق قليلة كانت فريدة متصلة على الإنترنت وبدأ الحدث بينها وبين أمها كالآتى:

فريدة: وحشتيني يا ماما قوى عاملة ايه طمئيني عليكي

أفنان: أنا تمام يا حبيبتي انتى اللى عاملة ايه وحياتك عاملة ايه ؟

فريدة: أنا الحمدلله تمام ماشية ببركة دعاكى ووصلت لحاجات كثير
كويسة

أفنان: زى ايه احكىلى ؟

فريدة: بقيت بمتلك أنا وحافظ حوالى ربع أسهم الوكالة .. حلمى قرب
يتحقق يا ماما وهشرفك زى ما كنتى بتتمنى غير كده أنا بقيت من
أهم الصحفيين فى الوكالة كمان بقى ليا دور رئيسى

أفنان: الحمدلله يا حبيبى إن الله لا يضيع أجر من أحسن عملا .. أنا
فخورة بيكى يا حبيبتي قوى

فريدة: ادعيلى يا ماما قوى ..

أفنان: بدعيلك يا حبيبتي دايماً والله هو أنا ليا مين غيرك

فريدة: ربنا ما يحرمنى من دعاكى ولا منك ابداً يارب

أفنان: هتنزلى امتى عشان أشوفك وحشنى انى احضنك قوى يا فريدة

فريدة: تانى يا ماما هنتكلم فى الموضوع ده .. أنا مش هنزل مصر يا ماما
غير لما اكون زى ما أنا بتمنى عشان اكون قدوة للجيل اللى بعدى
فين كلامك يا ماما

أفنان: موجود يا حبيبتي كلامى موجود بس انتى وحشتينى قوى

فريدة: ما أنا قولتلك يا ماما كثير ابعثلك زيارة انتى وجوزك تزورونى
هنا وعشان أتعرف عليه وتشوفينى ونتفصح بس انتى اللى مش
راضيه

أفنان: مش أنا اللى مش راضية ظروف شغل عامر ما تسمحش يا
حبيبتي اننا نساfer بس ان شاء الله هو وعدنى انه ياخذ أجازة
ونجيلك ان شاء الله

فريدة: أهم حاجة انتى مبسوطة يا حبيبتي

أفنان: قوى يا فريدة .. عامر دة عوض ربنا ليا عن كل حاجة وحشة
شفتها فى الدنيا

فريدة: ربنا يسعدك يا أمى يارب وباركلى فيكى وجمعنا على خير قريب
ان شاء الله

أفنان: امين يارب

فريدة: بتشوفى نهى أو أحمد أو نور يا ماما ؟

أفنان: بيزورونى كل فترة هما كويسين قوى فى حياتهم الحمدلله ما عدا
نور

فريدة: ليه مالها ؟

أفنان: انتى عارفة مشى نور فى الضلمة بيوصلها لأيه !

فريدة: ربنا يهديها يارب ويصلح حالها وعمرو يا ماما مفيش أخبار عنه ؟

أفنان: انتى لسة يا فريدة مش عارفة تخرجيه من قلبك؟

فريدة: غصب عنى يا ماما انتى عارفة

أفنان: حرام عليكى نفسك هو ما إتغيرش أصلاً يا فريدة أصبح إنسان

ملهوش وجود فى الحياة لازم ما يكونش ليه وجود فى قلبك كمان

فريدة: ما أنا أصلاً كنت عاوزة اتكلم معاكى فى موضوع بخصوص كده !

أفنان: خير يا حبيبتى ؟

فريدة: حافظ يا ماما!

أفنان: ماله ؟

فريدة: انتى عارفة طبعاً انه بيحبنى

أفنان: وبعدين ؟

فريدة: أنا مستحرمة وجوده جنبى كده وأنا مش حاسه بيه

أفنان: ف عايضة توافقى انك ترتبطى بيه وانتي مش حساه عشان تسبى
ليه أذى نفسى أكبر وتجرحية جرح أكبر مش كده ؟

فريدة: لأ مش كده بس أنا مستحرمة انى سايباه قريب منى كده
ففكرت انى اقرب منه بحيث انى ممكن أحس بيه

أفنان: الإحساس يا حبيبتي مش بمزاجك لو انتي حساه قربي لو مش
حساه يبقى تستنى يا فريدة بلاش تصلحى غلط بغلط اكبر منه يا
حبيبتي

فريدة: بس يا ماما هو كويس بيعمل كل حاجة تسعدنى وأنا حاسة انى
لو قربت منه ممكن احس بيه واكون زوجة كويسة

أفنان: ما إختلفناش بس هتعيشى معاه بجسمك وعقلك لكن مش
بقلبك ولا بتفكيرك ! حرام يا بنتى تكسرى قلب حد زى ما اتكسر
قلبك وانتي يا فريدة لازم تنسى عمرو نهائياً وتحاولى تعيشى حياتك
كفاية السنين اللى ضيعتها من عمرك تفكرى فى حد لا يصلح ..
ارجعى فريدة بنتى اللى أنا أعرفها عشان وحشتنى قوى.. فريدة القوية
اللى عُمُرُما حد أثر فى حياتها وخالها تكون ضعيفة كده

فريدة: هحاول حاضر .. أنا لازم أسيبك دلوقتي عشان عندى شغل
بكرة بدرى هكلمك بكرة زى دلوقتي وسلامى لكل اللى عندك

أفنان: فريدة بنتى عمرها ما كانت بتهرب من أى مشكلة .. واجهى
نفسك يا فريدة وشوفى نفسك فى المرايا .. شوفى وصلتى لفين وبقيتى
ازاى وخلقى بالك من نفسك يا حبيبتى, سلام

فريدة: سلام

بعد أن أغلقت فريدة جلست على سريرها تفكر فى كلام أفنان, هل هى
حقًا يجب أن تفيق من هذه الغيبوبة ثم وقفت ونظرت إلى نفسها فى
المرايا ونظرت إلى الشعيرات البيضاء التى بدأت تظهر فى مقدمة
رأسها مع دخولها سن ال 30 وهى لم تنتبه بعد لهذه السنوات وظلت
تسأل نفسها لماذا هى هكذا لماذا هى مصرة بأن تضيع عمرها هباءً
دون فائدة, هل هى فعلاً مخطئة فى حق نفسها أم أن الحياة هى من
وضعتها فى هذا, ظلت حائرة طوال الليل تفكر ولم تنم أصابتها حالة
من الأرق ففكرت فى أن تأخذ إجازة من العمل ومن حافظ لمدة
يومين لتعيد حساباتها مع نفسها وتستطيع أن تصلح الأخطاء التى
صنعتها بها الحياة.

فى الصباح الباكر اتصلت فريدة بحافظ فرد عليها بصوت ناعس : فى
ايه يا فريدة مصحيانى بدرى عن ميعاد الشغل ليه ؟

فريدة: كنت عايزة أطلب منك طلب

حافظ: أوامرى

فريدة: عاوزاك تاخدلى إجازة النهاردة وبكرة ممكن !

حافظ: ليه فى ايه ؟

فريدة: شكلى أخذت دور برد ومحتاجة أفضل فى البيت عشان أقدر أكمل

حافظ: أجيبك دكتور طيب

فريدة: لأ الموضوع مش مستاهل أنا هنام اليومين دول

حافظ: طيب خلاص هعدى عليكى بالليل عشان اتطمئن عليكى

فريدة: لأ مفيش داعى

حافظ: ازاي بس أنا عايز أتطمئن عليكى

فريدة: والله ما فى حاجة دول شوية برد مش أكثر

حافظ: طيب ممكن تكلمينى لما تصحى

فريدة: حاضر بس لو انت كلمتنى وأنا ما ردتش اعرف انى نايمة

حافظ: طيب ولو مش قادرة تتكلمى ابعطينى رسالة طمئيني عليكى

مممكن؟

فريدة: حاضر يلا تصبح على خير

حافظ: وانتى من أهله

أغلقت فريدة الخط وهى نفسيًا أفضل، عدم رؤيتها لحافظ لمدة يومين سوف يعطيها براحًا فى التفكير فقد قررت فريدة أن ترتب أفكارها بشدة وتعيد تخطيط المستقبل حتى تكون أفضل وكان يساعدها على ذلك كلام أفنان لها كانت تشعر أنها بحاجة إلى الجلوس بمفردها حتى تستطيع أن تكون أفضل، وبالفعل كان يوجد تحسن بنفسية فريدة فقررت أن تقطع إجازتها من حافظ فى اليوم التالى واتصلت به فرد عليها وقال: الو عاملة ايه دلوقتى؟

فريدة: الحمد لله أحسن كثير وانت ؟

حافظ: أنا بخير طول ما انتى بخير

فريدة: يارب دايماً وراك ايه بعد الشغل ؟

حافظ: ولا أى حاجة أنا تحت أمر مولاتى

فريدة: طيب أنا محتاجة أشوفك

حافظ: قوليلى انى وحشتك بقى

فريدة: على فكرة جدًا

حافظ: ده بجد ؟ دة أنا كنت بهزر

فريدة: ايوة بجد وحشتنى وعايزة أشوفك

حافظ: طيب يلا حالاً

فريدة: لا مش قوى كدة خلص شغل ومنتقابل فى مكاننا

حافظ: موافق جداً

فريدة: بلاش تتغدى عشان هنتغدى سوا

حافظ: عيونى

فريدة: وخلقى بالك من نفسك

حافظ: فريدة انتى كويسة ؟

فريدة: ايوة ليه ؟

حافظ: مش عارف ليه حاسس انك سخنة أصل أول مرة تقوليلى
وحشتنى لأ وكمان بتقوليلي خلقى بالك من نفسك ده ايه ده !

فريدة: الله هو الواحد كويس مش عايب ووحش مش عايب

حافظ: لا خليكى كدةه دايمًا أنا اسف ده أنا أصلًا مبسوط جدًا

فريدة: طيب يلا سلام بقى عشان الحق أجهز نفسى

حافظ: ماشى سلام

أغلقت فريدة الخط وفتحت خزانة الملابس واختارت أفضل فستان لديها وقررت أن تكون انثى من جديد كانت فريدة قد نسيت كيف تكون أنيقة .. كيف تتجمل, ظلت فريدة أمام المرأة لأكثر من ساعة تصفف شعرها وتضع بعض لمسات من المكياج حتى تكون برونق أفضل وبعد أن انتهت أصبحت انثى لا يستطيع أن يقاومها أى رجل, أشبعت فريدة الأنثى التى بداخلها من جديد وذهبت إلى المقهى الذى تقابل فيه حافظ عادة وطلبت أكثر وجبة تحبها هى وحافظ فعندما وصل حافظ لم يصدق أن هذه فريدة من شدة جمالها كأنه أول مرة يراها فقال لها: ايه ده .. أنا أول مرة أشوفك حلوة قوى كده! كنتى مخبية الجمال ده كله فىن

فردت فريدة بخجل شديد: كان مستخى واهو ظهر

حافظ: ممكن أطلب منك طلب ؟

فريدة: طبعاً

حافظ: ممكن تخليكى كده دايمًا

فريدة: بمعنى ؟

حافظ: خليكي فريدة دى أنا حاسس ان فى تغيير داخلى أكثر من التغيير
الخارجى وأنا مبسوط بيكى كده قوى

فريدة: من هنا ورايح مفيش غير فريدة اللى انت شايفها قدامك دى
وبس

حافظ: طيب عندى خبر حلو جدًا

فريدة: وأنا كمان

حافظ: طيب قولى انتى الاول

فريدة: لا ممكن تقول انت الأول

حافظ: طيب ماشى.. الخبر يا ستى الخبر يا ستى

فريدة: قول بقى

حافظ: احنا قربنا نحقق حلمك يا حلوة نصيبنا فى الأسهم عمال يزيد
وفى خلال 5 سنين أو أقل هنبقى أصحاب الوكالة رسميًا وهتبقى من
أهم سيدات الأعمال فى العالم الشرقى والغربى

فريدة: ده احسن خبر أنا سمعته فى حياتى احنا بنحقق حلمنا يا حافظ
أنا حقيقى مش مصدقة

حافظ: احنا ؟ أول مرة تقولى احنا بعد ما كانت أنا ملياكي أو مرة تقولى رأيك من غير ما أطلب منك واترجاكي

فريدة: من هنا ورايح مفيش غير احنا أنا اكتشفت انى من غيرك ولا حاجة لو انت ما كنتش جنبى طول السنين دى عمرى ما كنت هقدر أحقق حلمى لوحدى أنا حقيقى كان لازم يكون ليا شريك واللى اكتشفته كمان ان ما ينفعش انك تكون شريكى فى الشغل بس انت حقيقى هدية ربنا ليا عشان تكون شريكى فى كل تفصيلا فى حياتى .. النجاح ده لو كان من غيرك عمره ما كان هيكون ليه طعم

حافظ: واكتشفتى ده امتى ؟

فريدة: لما عدى يوم من غير ما أشوفك .. أنا لا كنت تعبانة ولا حاجة أنا كنت باخد إجازة منك كنت عايزة اعرف هو أنا ينفع أعيش حياتى من غير ما أشوفك ولو كان اليومين عدوا عليا عادى كنت همدهم لأسبوع وبعدين شهر عشان أشوف الفرق بس لما عدى 24 ساعة من غير ما اشوفك حتى فى الشغل بس حسيت ان الدنيا دى ملهاش طعم فريدة اللى انت شايفها قدامك دى بقى كده النهاردة عشان اكتشفت انك لازم تشوفها كده على طبيعتها اللى كانت عليها قبل ما تدخل الدوامه دى وتبقى انسانة مهملة فى نفسها وفى حياتها انت فوقتنى يا حافظ .. انت رجعتنى للحياة

حافظ: هو انتى بجدد دلوقتى ؟

فريدة: ايوة أنا بجد وانت بجد مش ده حلمك اللى كنت بتتمناه ؟ أدى
حلمك وحلمى اتحققوا سوا

حافظ: لأ لسه وعشان انتى حلمك لسه ما إتحققش أنا مش هحقق
حلمى غير لما حلمك يكمل, يوم ما تكونى من أهم سدات المجتمع
بنسبة 100% هتكونى مراتى لو تحبى

فريدة: لو أحب ؟ أنا اكتشفت ان دى أمنيتى اللى ما كنتش عارفها أو
بمعنى أصح انت هدية ربنا ليا

حافظ: لأ انتى اللى هدية ربنا ليا يا فريدة

فريدة: انت عودتى إن لما يكون نفسى فى أى حاجة اعملها صح ؟

حافظ: أحلامك أوامر

فريدة: طيب ثوانى

قامت فريدة وطلبت من المسئول عن اختيار الاغانى فى المكان أن يجلب
لها أغنية معينة لوردة الجزائرية وطلبت تأخير الأكل قليلاً ثم رجعت
إلى الطاولة وطلبت من حافظ أن يقف لى ترقص معه فقال: أنا
بعشق جنانك

فريدة: وأنا اكتشفت انى بعشقك وعشان انت جنبى ما اكتشفتش ده
غير لما بعدت عنى ليلة

ثم بدأت الأغنية وبدأت فريدة ترقص مع حافظ وتغنى له مع الأغنية
وتقول :

اه لوقابلتك

اه لوقابلتك من زمان كانت حياتى اتغيرت

ولا كان جرى كل اللى كان لكن دى قسمة اتقدرت

مقسوم لنا مكتوب لنا نرجع نقابل بعضنا

لما بقى آن الأوان

لو كنت جنبى من زمان كانت حياتى اتنورت

ولا كان نسى يوم الزمان بيعت بفرحة نورت

ليل جرحنا لو فرحنا داوى الجراح من قلبنا

لما بقى آن الاوان

لو كنت شوفتك من زمان كانت عينيا اتعلمت

معنى الحنان معنى الأمان

ولا من دموعها أتألمت

وادی بختنا شوفنا الهنا يوم ما قابلنا بعضنا

لما بقى أن الاوان

وبعد انتهاء الأغنية كان حافظ قد قبّل فريدة للمرة الأولى وصفق لهم الجميع, كانت فريدة تمتلك السماء بأكملها بين يديها كانت سعيدة سعادة غير متوقعة وكان حافظ يشعر بأنه يحلم ولا يريد ان يفيق أبداً من هذا الحلم الجميل وتعهدوا أن يبقوا سوياً حتى يتحقق حلم فريدة أولاً ثم حلم حافظ وتكون هذه الفترة لدراسة بعضهم أكثر بعد ما أصبحوا عشاق لا أصدقاء

ومرت 5 سنوات كالبرق وحافظ وفريدة سوياً يعملون بجهد حتى أصبحت فريدة من أهم سيدات المجتمع وتمتلك هي وحافظ الوكالة بأكملها وبعد أن حققوا حلمهم سوياً حددوا موعد الزواج بعد عيد ميلاد فريدة الأربعين التي قررت فيه فريدة الرجوع إلى الوطن لتحفل فريدة بعيد ميلادها وسط عائلتها الصغيرة ووسط اصدقاءها ولأول مرة منذ أن عرفت حافظ بدونه و ايضاً لتُحضر أمها وزوج أمها ليكونوا معها أثناء زواجها وكانوا قد أوشكوا على

الإنتهاء من كل ترتيبات الزفاف والذي منه فقررت فريدة أن تخبر
أمها بأنها سوف تأتي قريبًا بعد أن أنهت يومها مع حافظ أسرع إلى
البيت مبكرًا حتى تتحدث إلى امها فوجدت أمها متصلة على الإنترنت
في انتظارها فدخلت لتقول لها: ماما يا ماما

أفنان: يا عيون ماما وحشتيني

فريدة: وانتي وحشتيني أكثر مش عايزة تشوفيني ولا ايه ؟

أفنان: جاية امتي

فريدة: حالًا قريتي اللي في بالي

أفنان: طبعًا يا حبيبتى

فريدة: جاية يوم عيد ميلادى يا حبيبتى عشان نحتفل سوا سوا
عايزاكي تجمعى كل الناس بقى

أفنان: أنا مش مصدقة اخيرًا يا فريدة بعد كل السنين دى هاخذك فى
حضنى

فريدة: اخيرًا يا ماما انتصرت وحققت كل شىء بتمناه

أفنان: الحمدلله الحمدلله

فريدة: اعملى حسابك انك هترجى معايا انتى وزوجك العزيز

أفنان: عاملة حسابى يا حبيبتي ده يوم المئى اللى هشوفك فيه أحلى عروسة

فريدة: تفتكرى يا ماما هكون عروسة حلوة ؟ وهقدر أسعد حافظ؟

أفنان: طبعًا يا روحى هتكونى أجمل عروسة وأجمل زوجة

فريدة: خايفة قوى

أفنان: شعور طبيعى يا حبيبتي

فريدة: لا أنا مش خايفة من انى هتجوز أنا خايفة انى ما أكونش بقيت أصلح انى أكون زوجة وخصوصًا انى هيبقى عندى 40 سنة وأنا لسه آنسة

أفنان: ملهأش علاقة يا حبيبتي كل واحد فى الدنيا دى ليه ميعاد وده ميعادك وبعدين ما تقلقيش أنا لما اشوفك هنتكلم كتير فى الموضوع ده

فريدة: ربنا يستر

أفنان: ان شاء الله يا حبيبتي كل حاجة تمشى زى ما انتى بتتمنى

فريدة: قوليلي بقى مش عايزة اى حاجة اجيهالك وأنا جاية ؟

أفنان: هاتى نفسك وتعالى بسرعة أنا كده كده هاجى معاكى واللى
هحتاجه هبقى اجيبه انا

فريدة: هانت يا أمى هانت

أفنان: الف حمد وشكرليك يارب انى هشوفك

فريدة: انتى مش متخيلة أنا مبسوفة قد ايه انى هنام فى حضنك تانى
ولو لليلة

أفنان: طول عمرك فى حضنى يا حبيبتي حتى وانتي بعيد انتى جوا
حضنى

فريدة: ربنا ما يحرمنى منك يارب

أفنان: ولا منك يارب .. انتى عارفة أنا بشكر ربنا جدًا انه خلانى عايشة
لحد لما يبجى اليوم الى اشوفك فيه أنجح انسانة زى ما كنت بتمنى
لأ وكمان عروسة مع انسان شايلك فى عينيه ومحافظ عليكى من
قبل ما تكونى فى بيته

فريدة: ربنا بيكافئنى يا امى الحمدلله

أفنان: لادة بيكافئنى أنا الحمدلله

فريدة: هسيبك أنا عشان لازم أنام عشان أيامى الجاية كلها طويلة
قوى

أفنان: ربنا يقويكى يارب واشوفك على الف خير يارب

فريدة: ان شاء الله يا حبيبتي ان شاء الله

أفنان: خلى بالك من نفسك يا عمري

فريدة: حاضر يا حبيبتي وانتي كمان وسلامى لكل اللي عندك

أفنان: حاضر يا حبيبتي يوصل مع الف سلامة

فريدة: سلام

أغلقت فريدة مع امها وهى لا تعلم هل هى اخطأت لأنها كذبت عليها فى موعد حضورها أم لا لكن هذا خارج عن إرادة فريدة، من شدة خوفها هى تحتاج لأن تجلس مع نفسها فى بيتها القديم تستعيد شريط حياتها بأكمله أمام عينها حتى تستطيع أن تكمل مشوار العمر لكن على الرغم من ذلك هى كانت فى غاية السعادة كانت فى حالة شعورية متضاربة ثم اتصلت بحافظ كعادتها حتى تحدثه قبل النوم مثل كل يوم.

ثم مرت الأيام وباقى يومين على سفر فريدة كانت فريدة ذهبت مع حافظ للتسوق لتشتري هدايا كثيرة لكل العائلة والأصدقاء في مصر وفي اليوم التالي كان حافظ داعى فريدة على الغداء حتى يودعها ويشبع منها لأنها سوف تغيب عنه ايام حتى ترجع له من جديد فعندما وصلت فريدة قبل حافظ يديها وقال: هتوحشنى قوى

فريدة: دة هما كلهم كام بوم يا حبيبي وهكون معاك باقى العمر كله

حافظ: لأول مرة هتغيبى عنى

فريدة: أنا عارفة انت كمان هتوحشنى قوى

حافظ: لا انتى مش متخيلة انتى هتوحشيني ازاي

فريدة: مالك يا حبيبي فى ايه انت محسسى ان دى اخر مرة هتشوفنى فيها

حافظ: مش عارف أنا خايف قوى انتى مش متخيلة هيكونوا أسوء يومين فى عمري ازاي

فريدة: يا حبيبي معلش بس انت عارف هما واحشنى قد انة وقد انة أنا لازم اروح

حافظ: أنا عارف بس انتى مش متخيلة أنا بعشقتك قد ايه ومش هقدر اعيش من غيرك كام بوم, انتى عارفة أنا بعشقتك ازاي غصب عنى

فريدة: حرك عليا هعوضك كل عن كل ثانية أنا غبت فيها لما أرجع

حافظ: تروحي وترجعيلي بألف سلامة لولا ان لازم يكون في حد يتابع
الشغل هنا ما كنتش سيبتك ابدًا تسافري لوحدك

فريدة: ربنا ما يحرمنى منك ابدًا

حافظ: ولا منك يارب وحفظك ويجعل ليكى في كل خطوة سلامة لحد
ما ترجعى لحضنى

ثم بحتضن حافظ فريدة بشدة ويدخلها لأعماق حضنه وثم يوصلها
إلى البيت حتى ترتب باقى أغراضها ليوصلها غداً للمطار ولم ينم
طوال الليل من شدة خوفه من أن يفقد فريدة كأنه يشعر بأنها حقاً
سوف تكون آخر مرة يرى فيها روحه أمامه ثم يأتى غداً مسرعاً
ويوصل فريدة إلى المطار ويودعها ويحتضنها بشدة من جديد وهو
يبكى فتقول له: رجعالك والله رجعالك وبعدين أنا هنا معاك بروحي
لكن جسمى هو اللى هناك

فيرد قائلاً: روحك معايا طول العمر

ثم تدخل فريدة صالة الذهاب فى المطار وتختفى عن عيونه

لتفريق فريدة من غفوتها السارحة لتودع فريدة الدنيا وتودع ذكرياتها وأفاقت من رحلة الذكريات ورجعت إلى الحاضر مرة أخرى وأغلقت بوابة آله الزمن ورتبت أمتعها مرة أخرى حتى تتوجه إلى الاحتفال بعيد ميلادها الأربعون مع أمها وزوج أمها وأصدقاء العمر لقد جمعتهم لها أفنان ليتحفلوا معها بعد كل هذا العمر كانت أفنان حريصة على لقاءهم كل فترة لأنهم اصدقاء ابنتها الوحيدة وتشتم بهم رائحتها وقد كانت فريدة تعلم أن نهى قد أصبحت كاتبة كبيرة وتزوجت ومعها فريدة وأدم واستطاعت نهى أن تحقق أهدافها في الحياة عدا الحب لم تلقاه، وأحمد قد تزوج ببنت متفتحة تشبه فريدة بعض الشيء مع اختلاف الطباع ولديه يوسف وجنة ووجد الحب والزواج المثالي والأولاد ولكنه لم يستطيع أن يثبت ذاته وظل موظف ودخله محدود. أما نور قد أصبحت مطلقة ولا ترى اولادها لأن طليقها قد حرّمها منهم وجرت وراء شهواتها ولم تنل أى شىء فى هذه الدنيا.

أما عمرو فلم يتزوج مثل فريدة كل هذا العمر ولم يتغير أى شىء فى حياته فقد علّق حياته على الماضى فلم يعيش الحاضر ظل إنساناً فاشلاً بلا هدف، حقاً إن الحياة لا تعطى المرء كل ما يتمناه.

وفى طريق فريدة إلى القاهرة مرة أخرى أمطرت السماء احتفالاً برجوع فريدة فأوقفت فريدة السيرة حتى ترقص تحت المطر من جديد وتساءل نفسها هل يا ترى أستطيع أن ابدأ الحياة مرة أخرى بعد أن

وصلت إلى سن الأربعين ؟ هل ستفتح الأبواب لها مثل ما فتحت
لأمها بعد سن الأربعين ؟ هل تستطيع أن تُكوّن أسرة وتعيش الحياة
بعد أن ملّمت كل الذكريات وقررت دفنها ؟ لكنها تعرف أن الحياة لا
تعطى المرء كل ما يتمناه لكنها لا تستوعب هذه الفكرة تظن نفسها
أذكي من القدر ولكن بعد أن رقصت فريدة تحت المطر كانت تظن أن
السماء تبكى فرحًا لتطمئن فريدة على القادم في حياتها لكن خانها
إحساسها مع السماء للمرة الثانية في العمر كانت السماء تبكى على
سذاجة فريدة لأن القدر أقوى من أى شيء لأننا مُصَيَّرُونَ لسنا
مخيرون وبعد أن استأنفت فريدة الطريق إلى القاهرة كان القدر
يكتب كلمة النهاية لحياة فريدة في حادث مؤلم وكان يكفى من العمر
ما عاشته فريدة وجدت الحب في أول وآخر العمر والمال والسلطة
وإثبات الذات في المنتصف من العمر ولم يُكْتَب لها أن تعيش فترة
أخرى بالعمر لتكون زوجة وأم لأن العمر لن نعيشه مرة أخرى بعد
عمرنا.

فماتت فريدة ومات معها كل شيء في هذه الدنيا إلا أفكارها التي غيّرت
مسار حياة أشخاص آخرين وتعلموا من تجاربها في الحياة

ذهبت فريدة إلى السماء وتركت وراءها أشياء كثيرة وأشخاص تعلموا
منها الكثير تركت وراءها أناس أحبواها بشدة تركتهم ليبكوا ويرقصوا
تحت المطر من بعدها !

للتواصل مع الكاتبة

https://www.facebook.com/pages/%D8%B3%D9%87%D9%8A%D9%84%D8%A9/559727770826090?fref=ts&__mref=message

جميع حقوق الطبع والتوزيع محفوظة للناشر



Noon_publishing@yahoo.com

ت - 011-27772007 - 02 35860372